

APOCALIPSIS

Jesucristo Ihiifusuuno.

1 Moocaani Jesucristoco aciuhi diibo idudicamaajeminaaco ihifusuqui goovano iicajinehejeque. Jaanoco Jesucristo ifusuuhi idudicamaajeminaafico Juaco itoomominaafico agalluubofeenedi. ² Jaabo uujoho Jua miyaanoco jiiibuguuhi paryi aatyimeunoco, bu Moocaani iijico icano Jesucristo onoonofeenedi.

³ Imicani iicamo jihaameque ihiifinico. Tolliro bu imicani iicamo Moocaani jihaamefañodi ihiimaanoco uguubunicimoro imino jihaamefaño onoonoco omoonimo. Miiro tufucu fiitivucuui.

Jua Moocaani Iijaminaadi Caatinihi.

⁴ Uujoho Jua caatinihi Moocaani iijano Asia jiinijeri sahuse juugahuseti mijaaci icano iicajahajeminaadi. Jaamo amiihai magaayici Moocaani imino omooninoco, bu sajeebii icaco aacinoco icano. Jaabo Moocaani iicaabo bu diiboro iicaubo, bu diiboro asaajiibo icano. Bu tolliro sahuse juugahuseti miimisiici icano imino gaijami Moocaani aivoji icaga imefeeneri iicamo aacinoco magaayici. ⁵ Bu tolliro Jesucristo aacinoco magaayici. Diibo miyaanoco ijiibogoobo, bu iguijevemefeeneti iticoni ubuheeteubo. Jaabo jiinijeminaa aivojito aivojiibo iicaabo. Jaabo Cristo miihaico agaijiiboro itijeheri mohimitico nitiuhi. ⁶ Jaaboro miihaico aivojitoti, bu sacerdoteti icano eetavuui diibo Caani Diosco mejeecivequi. Jaabo jaafa mitya, bu cahacisu icano icahi fahijivaro finiratio. Fine.

⁷ Memeeeci oono Cristo aimuufaifeenedi saaji. Jaaboco famooro atyimeji, bu diiboco ahaamiumo atyimeji icano. Jaaboco paryi jiinijeminaa aatyimemere taaji. Jiihi tolliji. Fine.

⁸ Uujoho imegaoobo, bu allivioobo icano, abecedario iticoni A iicabadi, bu allibati Z iicabadi iicaabo, noobo Jesu Aivojiibo Moocaani sihidi ejeevaabo. Diibo iicaabo, bu iicaubo, bu asaajiibo icano.

Cristo Imi Gaija.

⁹ Uujoho Jua miyaavogofaño amiihai nahabo. Jaabo amiihaima sano idaasuno icahi, bu Moocaani aivojifaño icahi, bu tolliro jaabicico Jesucristo aacinofaño icano. Jaabo uco icivojaanijirunohachuta uco gañiiumo Patmo onoochugaivi Moocaani iiji Jesucristofañodi miyaano iicanoco ijiibeguehicaunohalliti.

¹⁰ Jaanaaca Aivojiibo fucu jaguisifucusumi uujoho Moocaani Gaijafeenedi esamaaihicaunaaca tabujinaagoti sefano guubuvusuuno miricu ojibadi. ¹¹ Jaano uco nuuhi:^a Jino adaatyimeneque aamefaño caatini. Jaaboro Asia jiinijeri sahuse

a 1.11: Sahaamefaño janaanici jilli ficuumo: Uujoho imegaoobo, bu allivioobo icano A, Z icano iicabadi, onoonoco.

juugahuseti mijaaci icano iicajahajejaagovi gallu. Jino imomo iicajahajejaagovi; Efeso, Esmirna, Pergamo, Tiatura, Sardi, Filadelfia, Laodicea icanojaago, noonoro.

¹² Jaaneguiiha acafesaavooboro meeciuihi: ¿Miiijoho ico, fine, uuma iimaahi? nooboro. Jaabo atyimeuhi sahuse juugahuseti minooci icano cuugahu ficuta iicuno oro eetavotaco. ¹³ Jaanofeeneri Miyaminaafibadi Ifiivuubo ifibadi iicaaboco atyimeuhi. Jaabo itihaicivi ifotocinichehuco jiiiciniiboco jaachehu oro niivigaimeeheri siyiciniuhi ifeeyijevi.

¹⁴ Jaabo nigaijeeneu aivo seseene jadiotobadi. Jaanoti ihaalliinou ciijigaiguiihunobadi jeevauhi. ¹⁵ Jaanoti itihaiñou namecuno ifuvusuhi bronze aparyicisucinobadi, ciijigaifañodi eheetavocininobadi. Jaanoti ico sefano guubuvusuhi sihidi guisino uguubuvusunicibadi. ¹⁶ Jaanoti imiyanaagohusefano icaumo meeciri sahuse juugahuseti miimisiici idiimo. Jaanoti iijifanoti inoociniga niisuga siijevaga fahigovahaciti siijevassuciniga. Jaanoti ihime nihiba sefano aachicinisumi iicabadi jeevauhi.

¹⁷ Jaaboco aatyimeuneri iguiinovi acutuuihi chuuhubadi. Jaarunaaca imiyanaagohuseque tahallivi ificuuboro uco nuubo: Diguetejirahana Uujoho iticonioobo, bu diiboro allivioobo iicaabo icano. ¹⁸ Uujoho iicaabo guijeveura. Jaaruubo buheehi, ufucuro milli icacutiibo iicaqui. Jaabo uujoho guijeve janaanici mityacuuihi. Jaaneguiiha guijeve minaa iicahigo uudi sihidi jeevatino. Jilli iimogobadi moonijirahi. ¹⁹ Jaaneguiiha jino adaatyimeneque caatini, jino jisumi icanoco, bu ufucuro icajinoco icano. ²⁰ Jino tamiyanaagohusefano sahuse juugahuseti miimisiici icamo meecirico adaatyimene agaajaratino jilli eneejiruno: Jaamo diito meeciri sahuse juugahuseti mijaaci icano Moocaani iijano jiiibogominaaditi, eneejiruno. Jaanoti bu sahuse juugahuseti minooci icano cuugahu ficuta iicuno oro eetavota jilli eneejiruno: Sahuse juugahuseti mijaaci icano Moocaani iijanoco, eneejiruno.

Moocaani Iijanojaagovi Iijico Agalluuno: Efeso cuumijaagovi Iijico Agalluuno.

2 Efeso cuumiri Moocaani iija iicaja jiiibogominaafidi caatini: Jilli noobo imiyanaagohusefano sahuse juugahuseti miimisiici icamo meecirima iicaabo, bu tolliro sahuse juugahuseti minooci icano oro eetavota cuugahu ficuta iicunofeenedi iigoobo icano: ² Uujoho gaajahi paryi fanoovaaco edeetavehicanoco, bu sefano dudidamaajeque edeetavehicanoco, bu adaabichicanoco icano. Bu tolliro gaajahi iimitimoco adaabicitinoco. Bu uujoho tolliro gaajahi Moocaani galluminaa eneehicarumo miyaano iicatimoco iijoho inisuuboro bañiminaa iicanoco agaajacinoco. ³ Jaabo iijoho sihidi daabichicahi, sihidi idaasuno dicahicahi, bu uuguiiha sihidi dudidamaahicahi niinovatotitibo icano. ⁴ Jaarunaa dihallivi icano sano: Miio iticoni imiyaavuguusumi uco sihidi gajjuhi. Jaaruubo jisumi miidinoro gajjuuuihi. ⁵ Jaaneguiiha deesafoto iticoni edeesamaaiunoco. Jaaboro difico dimibachuubo iticoni omoonihicaubadi mooni. Jaanoti tolli omoonitihachijiji dijaagovi ofooboro dicuugahu iicuco idiiti dumititiciji, dihimitico edeevesutitihachijiji. ⁶ Jaarunofano jino iimino dihallivi icahi, Nicolaitami omooninoco idiiheguene. Jaanoco bu uujoho jiiheguuhi. ⁷ Amiihai nohojima mihicamo muguubu jino Moocaani Gajja, Moocaani iijanominaco onoonoco: Mityano iicamoco fiivo imoho Moocaani gohasihalliti icaho noovatati machusuji.

Esmirna Cuumijaagovi Iijico Agalluuno.

⁸ Esmirna cuumiri iicaja Moocaani iija jiiibogominaafidi caatini: Jilli noobo imegaoo, bu diiboro allivioobo icano iicaabo, iguijeveuruubo,

siino ubuheeteubo: ⁹Uujoho gaajahi paryi ijoho omoonihicanoco, idaasuno idiicahicanoco, bu fanoovati ucuujivaachunoco icano. Jaaruubo ijoho jinejete cuujivaachutihi. Tolliro bu uujoho gaajahi: Miihai judiomi, unuurumo iiditi imitino ihiimaahicanoco. Jaamo judiomi unuurumo jilli Satanas iji igaivominaaro. ¹⁰JaaneGUIha diguetedino idaasuno idiicajinoti. Miïro iji amiihaiti saathoco civojafaño jiihacusui. Jaamo paryi amiihai minisucafetehi. Jaamo fahuseeci fucuva ticovovi idaasuno mihicaji. Jaarunofaño suufenitiibo diica iguijevejinohachuta. Jaachijji toono jaada ico uujoho fiivoco aciji. ¹¹Amiihai nohojima mihicamo muguubu jino Moocaani Gaija, Moocaani iijanominaaco onoonoco: Mityano iicamo iguijeveme cijigaifaño feejitihi.

Pergamo Cuumijaago Iijico Agalluuno.

¹²Tolliro bu Pergamo cuumiri iicaja Moocaani iija jiiibogominaafidi caatini: Jilli noobo iniisuga fahigovaciti isiijevasucinigama iicaabo: ¹³Uujoho gaajahi paryi ijoho omoonihicanoco, bu gaajahi Satanas atajiiibahigo ijoho idiicanoco. Jaaruubo ijoho uco jeevesutiibo diicahicahi. Bu tamiya jiiibogominaafi Antipa onoboco amiihaifeenevi oono Satanas iicamañovi agaicaausumi uco imiyaavogonoco jeevesutiibo diicahicahi. ¹⁴Jaarunofaño dihallivi fiivaano icano: Toono Pergamo cuumivi iima iicamo saatho Balaam jiiibogoco jeevesutimo icamo. Jaabo diibo Balaam onobo Balac onoboco adjiiniuhi israelmi imitico imooniqui jihovo caanimi jeevivo asimico uduuneri, bu gaigoomima imitinono iicaqui icano. ¹⁵Tolliro bu iima icamo oono Nicolaitami jiiibogoco jeevesutimo iicamo, toonoco uujoho iijihuguene. ¹⁶JaaneGUIha iimitico mejeevesu. Jaanoti mejeevesutihachijji goovano amiihaijaago feeji. Jaaboro diitoma amocasiji taajifañoti ihiinoga niisuga fahigovahaciti isiijeva iicagari. ¹⁷Amiihai nohojima mihicamo muguubu Moocaani Gaija, Moocaani iijanominaaco onoonoco: Mityano iicaaboco toovono iicamo manati machusui. Jaaboro diiboco aciji seseeyi guisiyico. Jaayihallivi bohono imomo caatiniciniji. Jaamomoco miiijoho gaajajitihi idiiboro toonoco agaayiciibo gaajaji.

Tiatira Cuumijaagovi Iijico Agalluuno.

¹⁸Tolliro bu caatini Tiatirari Moocaani iija iicaja jiiibogominaafidi: Jilli noobo Moocaani Achi oono ihaalliino cijigaiguiihunobadi iicaabo, bu itihaiño bronce aparyicisucinobadi iicaabo: ¹⁹Uujoho gaajahi paryiicino ijoho omoonihicanoco, gaijima idiicanoco gaajahi, bu dimiyaavogoco gaajahi, edeevichehicanoco, dijaabacico icano. Bu gaajahi iticoni omooniuo janaanicivi jisumi omooninoco. ²⁰Jaarunaaca sano icahi dihallivi. Oono Jezabel onogo: Moocaanijaagodi iimaahi, onooogo tajeecivominaaco iijibegueneri abañihicagoco adaabicihicanoco. Diigo jiiibeguehicahi diitoco gaigoomima imitinono iicaqui, bu tolliro jihovo caanimi jeevivo asiminoco iduuhicaqui. ²¹Jaagoco uujoho teemehicarahi iimitico ijeevesuqui. Jaarunofaño ihajevaco jeevesuhicatigo. ²²JaaneGUIha diigo omoonihicanoco diito ejeevesutihachijji diigoco uujoho guihuvasui, diigojaago efeehicamo idaasuno iicaqui. ²³Jaaboro diigo seemeque gaisiraiciji. Jilliti paryiicino Moocaani iijanominaa gaajaji uujoho miyaminaa esamaajeneque paryi agaajanoco, bu paryi ijeebiinofaño iicanoco agaajanoco icano. Jaaboro paryi amiihaico amiihai

moonihicano jaadaco aciji. ²⁴ Jaanoti bu amiihaiti saatoho toono Tiatira cuumiri mihicamo tobogoco mihimogotimo, bu oono diito sihidi ejeevano agaajaratino Satanas iiji eneehicanoco minisutimoco neehi: Sibogoco siino amiihailhallivi ficutihi. ²⁵ Jino toonoma mihicanoco imino mificu uujoho tahi asaajinohachuta. ²⁶ Jaaneguiiha mityano iicamoro uujoho iimogonoco eetavomoro nijequevi iifotomoco aciji mityaco jiinijeminaahallivi. ²⁷ Jino uco Guihirubi mityaco aacibadi. Jaamo jiinijeminaaco tajiibaji sefano jigaiñehiri nifaqui illunoco magasuucunicino iicabadi. ²⁸ Jaamoco bu cuujetavio meecirigaaco aciji. ²⁹ Amiihai nohojima mihicamo muguubu Moocaani Gaija, Moocaani iijanominaaco onoonoco.

Sardi Cuumijaagovi Iijico Agalluuno.

3 Tolliro bu caatini Sardi cuumiri iicaja Moocaani iija jiibogominaafidi: Jilli noobo sahuse juugahuseti miimisiici idiino Moocaani gaijamima iicaabo, bu tonoodimoro imeecirigaimima iicaabo: Uujoho gaajahi paryiicino iijoho omoonihicanoco, bu saatoho: Buheebe, ico eneehicarunoco. Jaarunaa ico dijeebii iguijevecunoco uujoho gaajahi. ² Jaaneguiiha deesiciniiboro sefatusu imino omooninoco, miiro oono fiiticuuno miinoco imitasuquiguiiha. Miiro uujoho gaajahi toono iijoho omoonihicano Moocaani imegavi imino iicatinoco. ³ Jaaneguii desafoto oono jiibogoco agaayiciunoco deevesudino. Jaaboro dihimitico deevesu. Jaanoti edeesicinitihachiiji oono nanivaminaafi ofoonicibadi gaajaciratino uujoho dijaa feeji ico dihimitihalliti aamiqui. ⁴ Jaarunofaño iima icamo tahi Sardi cuumivi miidimo imino iicamo imitico eetavotimoro iicamo. Jaamo uuma sesechehujefaño ijicamaaimoro igueji imino iicamaño. ⁵ Jaamaño mityano iicamo sesechehujefaño jicucafeteji. Jaamo ifinijitino fiivoma iicamo momoco caatinihi fiivohaamefaño. Toohaamefañoti imomoco fillujitihi. Jilliro diitoco Guihirubi imefeenevi, bu itoomominaa imefeenevi icano: Diitoco uujoho gaajahi, neeji. ⁶ Amiihai nohojima mihicamo muguubu Moocaani Gaija, Moocaani iijanominaaco onoonoco.

Filadelfia Cuumijaagovi Iijico Agalluuno.

⁷ Tolliro bu Filadelfia cuumiri iicaja Moocaani iija jiibogominaafidi caatini: Jilli noobo iimiibo, aivo miyaabo iicaabo, aivojiibo David llavema iicaabo. Jaabo afaayicinoco miijoho fabaacujitirahi, bu afabaacininoco miijoho faayicijitirahi icano: ⁸ Uujoho gaajahi paryi iijoho omoonihicanoco. Jaabo uujoho dihimegavi guhugaco faayiciji diibeguequi. Jaanoco mihiainooba jilli: Diibeguedino, neejitirahi. Miiro sihidi sefatiiruubo tajiibogoco agaayiciiboro uco tuunamaaitihi. ⁹ Jaaneguiiha Satanas igaivominaaco galluji: Miilai judiomi, noomoro abañifihicamoco. Jaaboro diguiinovi diitoco tajiibaji imemuinamaaquui, toonoti ico uujoho agaijinoco igaajaqui. ¹⁰ Jaanoti uujoho atajiibanoco imino moonihi iijoho fanoovaaco adaabiciibo. Jaaneguiiha bu ico uujoho imino teemeji nisufucu paryi jiinijehallivi asaajinoti, paryiicino jiinije miyaminaaco nisuqui. ¹¹ Goovano saaji. Jaaneguiiha imino ficu iima iicanoco, sita dihacitaco dumitiicidino. ¹² Jaaneguiiha mityano iicamoco uujoho Guihirubi iijafaño ficuji tooja imahacinobadi iicaqui; jaamo tahigoti ufucuro inuucutimo iicaqui. Jaamohallivi uujoho caatiniji Taacaani momoco, bu Taacaani cuumi momoco icano. Jaacuumi Moocaani niquejefañoti asaacuumi momo bohono Jerusale onocuumi. Tolliro bu uujoho diitohallivi tamomo

bomomo iicamomoco caatiniji. ¹³Amiihai nohojima mihicamo muguubu Moocaani Gaija, Moocaani iijanominaaco onoonoco.

Laodicea Cuumijaagovi Iijico Agalluuno.

¹⁴Tolliro bu caatini Moocaani iija Laodicea cuumiri iicaa jiiibogominaafidi: Jilli noobo aivo miyaabo iicaabo, miyaanoco eneefiibo, diiboti paryi Moocaani ifiivusuno atanoochiniibo: ¹⁵Jaabo uujoho gaajahi ijoho paryi omoonihicanoco. Jaabo ijoho miidino miyaavogoma idiicaabo miivi nifaihu aiguucufaihubadi edeevanoco gaajahi. ¹⁶Jaaneguiiha iijifañoti foomovaiba iicafaihuco agañiinicibadi ico uujoho esicinihi. ¹⁷Miïro: Uujoho sihidi busumijema icahi, bu uuma aivo imino foono neehicahi, bu jinejebati ucuujivaachutihi, neehicahi. Jaaruubo ijoho gaajacitihi idaasuubo idiicanoco, imo icama idiicatinoco, bu cuujivaachuma idiicanoco, dihaalliinama achahanoco, bu botiïbo idiicanoco icano. ¹⁸Jaaneguiiha ico uujoho neehi: Uti naaje oroco ciijigairi imino imibachucinunobadi iicano miyaavogoco. Jaabo miyanotiro sihidi busumijema diicahi. Bu jaaboro uuditi naaje eseseene gaachehunoco. Jaabo idicamaaiboro nucufesuno sicaibo diicacujitihi. Tolliro bu uuditi aalliino taabutaco anaajeebere dihaalliinofaño ficu. Jaabo imino daatyimehi. ¹⁹Uujoho agaijimoco ibahi, aamihi icano. Jaaneguiiha aivo quehecuno diicaabo dihimitico deevesu. ²⁰Meeci jino uujoho dihimigari julleecinihi coovaaboro. Jaanoco cajaatyohacho uco uguubuuboro: Tajaa disaa, onooboma icaji, bu diibo uuma icaji icano.^b ²¹Jaaneguiiha mityano iicamoco uujoho tahaivoji icagahallivi tacojivi casihacuji, oono uujoho mityano iicamaño Guihirubima ihaivoji icagahallivi acasiivobadi. ²²Amiihai nohojima mihicamo muguubu Moocaani Gaija, Moocaani iijanominaaco onoonoco.

Niquejefañ Moocaanico Iimono.

4 Jinobuunati emeciubo atyimeuhi niquejefañ guhuga faayicinihugaco. Jaanaaca oono uuma miriicu ojibadi iticoni ihiimaauno uco nuuhi: Juu caamovi disaa, jinobuunati iicajinehejeque ico iifusuqui.

²Jaasumiro uujoho sano Moocaani Gaija mityaguini novu minifutuui. Jaabo atyimeuhi aivoji icaga niquejefañ iicagaco. Jaagahallivi saafi giciniiboco atyimeuhi. ³Jaano halliri igiciniibo ifi ifuvusuhi namecuno jaspe onoono guisiyi namecubadi, bu cornalina onoono guisiyi namecubadi icanoco. Jaagahallidi bu tihi cajetaciniuhi esmeralda onoono guisiyi namecubadi inamecu icaabo. ⁴Jaagahallidi bu sigaaje veinticutrodigaava gicinigaaje icauhi. Jaagaajehallivi iticovoocivi quillahuto icauhi. Jaamo sesechehujefañ jicucuuciniuhi, bu inagainohalliri icauno oro eetavota chaahimigano icano. ⁵Jaagafañoti anamebanoro sefano sisiimi guubuvusuhicauhi. Bu jaaga imegati nifotocinihicauno sahuse juugahuseti minooci idiino cuugahunu. Jaano toono Moocaani gajano sahuse juugahuseti minooci idiino icano. ⁶Jaaga imegavi bu icauno muuaibadi jeevano jacuno sinaagonovi foovono iifuvusunu. Bu jaagahallidi icaumo igueenemehejedimova fahigovati sihidi ihaalliinama iicaumo. ⁷Jaamoti saafu leonbadi jeevauhi. Jaanoti

b 3.20: Griego iijiri noono: Meeci jino uujoho guhuga imegari julleecinihi tetecuboro. Jaanoco cajaatyohacho uco uguubuuboro iguhugaco afaayicimo iijafaño jicafeteji diiboma imachuqui, diibo bu uuma imachuqui icano.

allivioobo torobadi jeevauhi. Jaano allivioobo miyaminaafi imebadi jeevauhi. Jaano allivioobo ciimimi mogaaje agahafotoobobadi jeevauhi.
⁸ Jaamo paryi diito iticovoocivi sahuse juugahuseti sacu idiino ijijecunoma icaui. Jaamo ifi sanohaalliineriro gahaficiniuhi alliomoti fañoomoti icano. Jaamo fucuhachuta, cuujehachuta icano suufenitimo neehicaui:

Imiibo, imiibo, imiibo, Aivojiibo, Moocaani sihidi ejeevaabo.

Diiboro iicaubo, bu diiboro iicaabo,

bu diiboro asaajiibo icano, noomoro.

⁹ Jaamoro diito ihaivoji icagafaño igiciniibo ufucuro ifinijitiiboco acahacisusumi, iimosumi, obocigosumi icano ¹⁰ oono veinticuatrodimos quillahuto iicamo diibo imegavi ememuiivomoro imehicaui ono ufucuro ifinijitiiboco. Jaamoro diibo aivoji icaga imega ichaahimiganoco atafusumoro neehicamo:

¹¹ Aivojiibo Moocaani, ijoho aivo sihidi edeevamaño gaayici; cahacisuco, bocigoco, mityaco icano, ijoho fanoovaaco edetavumaño, ijoho idiimogomaño ifiivunoro icano, noomoro.

Afaayiciratino Aame.

5 Jaadi atyimeuhi ihaivoji icagahalliri igiciniubo miyanaagovi usefaño aame paimicinihaame fahigovaaciti caatinicinihaameque. Jaahaame sahuse juugahuseti minooci idiineri kuhufono sisiciniuhi. ² Jaanaa guubuui Moocaani toomominaafi sefano idilluhicaunoco: ¿Cajaani fine aivo iimiibo isisitaaco udubaiciiboro jihaameque faayicijirahi? nooboro.

³ Jaarunofañ niquejefañ, bu jiinijehallivi, bu jiinijeguiino icano mihihañooba aivo chahauhi toohaameque afaayicimoro emeeciirumo.

⁴ Jaaneri uujoho sihidiro taahicaui. Sano imifitimoro iicauneri toohaameque afaayiciiboro jilli ajashunogayi emeeciirumo achahauneri.

⁵ Jaanaa quillahutoti saafi uco nuuhi: ¡Taacudino! Miho Juda cuumi Leon onobo, aivojiibo David Iyaachimihaoobo iicaabo fanoohimitico guinonicuui. Jaaboro paryi toohaame sisitaaco udubaiciiboro ifaayiciqui.

⁶ Jaanaaca ihaivoji icaga, bu igueenemehejedimova iicamo, bu quillahutofeenevi icano atyimeuhi saafi Corderobadi iicaabo julleeciniuboco. Jaabo agaicauciniibo ifibadi ifi iifuvusuui. Jaabo sahuse juugahuseti minooci idiino iiniconoma icaubo, bu tonoodinoro icauno ihaalliino. Jaano toono ihaalliino sahuse juugahuseti minooci idiino iicamo Moocaani gaijano paryi faajiinijehalliviro agalluuno. ⁷ Jaanaa diibo Corderobadi iicaabo ufuuboro ihaivoji icagahalliri igiciniubo miyanaagohusefanoiti toohaameque icijeui. ⁸ Jaahaameque gaayiciubaaca igueenemehejedimo iicaumo, bu veinticuatrodimos quillahuto iicaumo icano diibo Corderobadi iicaabo imega memuiinamauihi. Jaamo iquillahuto iticovoocivi iharpanoma icaui, bu oro guirihillunofañ maaniguijinoma icaui icano. Jaamo Moocaanita iicamo diiboma ihiimaasumi maaniguijico ijigasuno diibojaa uusunicibadi jeevahi. ⁹ Jaamo jiiji bohono masijico jilli masivahicaui:

Ijoho aivo idiimimaño toohaameque idiiciiboro isisitaaco sinaayu.

Miho iguijeumaño ditiijeheri diitoco Moocaanidi naajeui

fahigova miyaminaati, fanoohiiji miyaminaati, faacuuminivati,

bu fanoojiinije cuumino miyaminaati icano. ¹⁰ Jaaboro diitoco

Moocaanidi aivojitoti, bu sacerdotemiti icano deetavehi.

Jaamo diito jiinjehallivi tajiibaji, noomoro.

¹¹ Jaadi emeeciubo guubuui ajashutimo Moocaani toomominaa ihiimaunoco, togahallidi, bu igueenemehejedimo iicaumohallidi, bu quillahuto iicaumohallidi icano. Jaamo itoomominaa aivo ajashutimo millones y millonesdimo iicamo sefano neehicauhi:

¹² Jaani Corderobadi iicaabo agaicaaucafutuubo aivo iimimaño, jaafa gaayiciibo mityaco, sihidi busumijeque, bu gaajaco, bu sefaco, bu bocigoco, bu cahacisuco, bu imoco icano, onoonoco.

¹³ Tolliro bu guubuui fanoova Moocaani ifiivusuuno niquejefañi iicano, bu jiinjehalliri iicano, bu jiinjeguiino iicano, bu muuaifañi iicano, paryi tonehejefañi iicano jilli unuuno:

Bocigoco, bu imoco, bu cahacisuco, bu mityaco icano jaafa acicafetehi oono ihaivoji icagahalliri igiciniiboco, bu tolliro Corderobadi iicaaboco fahijjivaciviro, unuunoco.

¹⁴ Jaanoti oono igueenemehejedimo iicamo neehicauhi: Jaafa tolli icano, noomoro.

Jaanoti bu veinticuatrodimi iicamo iquillahuto ememuiivuumoro imuumo fahijjivaro iicaaboco.^d

Sahuse Juugahuseti Minooci Idiino Isisita Icano.

6 Jaadi atyimeuhi Iorderobadi iicaabo toohaame sisitaati sanooco iticoniibo isinaayuunoco. Jaanaa guubuui igueenemehejedimo iicamoti saafi sefano sisi igiiriribabadi: iJuu saabo meeciva! nooboro uco unuunoco.

² Jaaneguiiha emeeciubo atyimeuhi caballo seseenbeque. Jaabohalliri iicaubo usefano tiibuga icauhi. Jaaboco Moocaani aciui chaahimigaco. Jaanoma fuubo guinoniiboro, bu fahijjivaro guinoniiboro iicaui.

³ Jaanaa allivio sisitaaco siino Iorderobadi iicaabo isinaayuuno ticovovi guubuui igueenemehejedimo iicamoti sifi: iJuu saabo meeciva! nooboro uco unuunoco.

⁴ Jaabo atyimeuhi sicaballo tifaibo ihiinuuboco. Jaabohalliri iicaubo mityaco gaayiciui jiinjehalliti sajeebii icaco ifinisuiboro miyaminaaco fahigovavi imoonicasisuqui. Jaaboco Moocaani ajashutino niisugaco aciui.

⁵ Jaana allivionoco bu siino Iorderobadi iicaabo isinaayuuno ticovovi guubuui igueenemehejedimo iicamoti sifi: iJuu saabo meeciva! nooboro uco unuunoco.

Jaanegui emeeciibo atyimeuhi saafi caballo civooboco. Jaabohalliri iicaubo oovota meecuco gaayiciniuhi. ⁶ Jaanaa guubuui igueenemehejedimo iicaumofeeneti unuunoco: Safucuo ducicamaaje jaada trigoti sano kiloviro ifeteji; jaabadiro bu safucuo ducicamaaje jaada cebadati tres kilodinoviro ifeteji icano. Jaanoti diiribanoco, bu vinofaihunoco icano bañamaaisudino, noonoro.

⁷ Jaanobuunati bu siino allivio sisitaaco Iorderobadi iicaabo isinaayuuno ticovovi igueenemehejedimo iicamoti niinoobo: iJuu saabo meeciva! nooboro uco unuunoco.

⁸ Jaaneguiiha emeeciubo atyimeuhi saafi caballo guiguivaaboco. Jaabohalliri iicaubo momo Guijeve onoobo. Jaabo dojicuti saabo

d 5.13, 14: (Filipenses 2.9-11)

saafi guijeveminaa iicahigo abajaabo. Jaabo Guijeve onooboco Moocaani mityaco aciuihi jiinije miyaminaati samañootohallivi diitoco iminaanineri, bu ajebari, bu guihuvari, bu jiinijehalliri iicamo inihicufino asimiri icano iguijeniqui.

⁹ Jaano allivio sisitaaco Iorderobadi iicaabo isinaayuuno ticovovi jeevivoco omoonifinoguiino, iicamoco atyimeuhi Moocaani iiji miyaano iicanoco ijiibugunohalliti iguijeniumo jeebiinoco. ¹⁰ Jaamo sefano jilli neehicauihi: Idiimiibo Aivojiibo, onoonoco abañitatiibo, imihachutahiica diicaji miihaico iguijeniumo jiinijehalliri iicamoco emeeciiboro ijaadaco adaacijino? noomoro.

¹¹ Jaasumiro diitoco Moocaani aciuihi seseeneene gaachehunoco. Jaaboro diitoco nuubo: Majaguisihiica jaafahi amiihai nahabomi Cristodi ududicamaaimo ihoovovi ifetehi, jaamoco amiihaico iicaubadiro agaicaaunohachuta, nooboro.

¹² Jaano allivio sisitaaco Iorderobadi iicaabo isinaayuuno ticovovi emeeciubo atyimeuhi jiinije sefano amaryibanoro udujavanamaaiunoco, bu nihiba icivono gaachehubadi iminifutuunoco. Jaanoti fucuo nihiba tiijohobadi minifutuuihi. ¹³ Bu meeciri niquejefañoti jiinijehallivi aifuuhi oono imoho noovata seenere sefano guibuhuba iicaneri baavi aaifonicibadi. ¹⁴ Bu niqueje sano finiuihi aameque mapaimirubadi. Bu paryi ifabaino, bu ifachugaiño icano simañehejevi jeeneuhi. ¹⁵ Jaano ñihicuti jiinije aivojito ifahojinofaño, bu guisigajinofaño icano fataniinamaaiuihi. Jaamo tahi fanoohaivojitoma, sihidi inihibaminoma iicamehejema, bu amocasiminaa aivojitehejema, bu aivo sihidi ejeevafiimoma, bu paryi faaboho jijovotoma, bu jijovoto iicatimoma icano ¹⁶ ifabainoco, ifagajinoco icano neehicauihi: Mohallivi mahaifo. Jaanoro miihaico jaadi johono ihaivoji icagahalliri igiciniibediti mafataani, bu oono sihidi jeevaneri Corderobadi iicaabo aamijino ñihicuti icano.

¹⁷ Miiri jino sihidi jeevano ahaamijifucu gasecuuihi. ¿Jaanoco bu miiijoho jaabicijirahi? noomoro.

Israel Cuumiminaati Iicimo.

7 Toonobuunati atyimeuhi igueenemehejedimo Moocaani toomominaa paryi jiinijejinibacihalliri jullelleecinimoco. Jaamo igueenemehejedimo iicano jiinije guibuhubaco gaayiciniuhi, jiinijehallivi ajashuno guibuutino iicaqui, bu muuaihallivi, bu imohonohallivi icano. ² Tolliro bu atyimeuhi saafi Moocaani toomominaafi Moocaani iicaabo mityama icaabo aamijijaagoti saauboco. Jaabo sefano coovadiivuuihi saatoho igueenemehejedimo iicaumo jiinijeque, bu muuaico icano imitino imooniqui mityaco agaayiciumoco. ³ Jilli nooboro: Jiinijeque imitino momoonidino, bu muuaico, bu imohonoco icano Moocaani jeevivominaaco ihimecunoti diitoco Moocaani gaajataco mificutinohachuta icano, nooboro.

⁴ Jaamo diito iicicafutuumo oovoco jinoodino guubuuihi: Ciento cuarenta y cuatro mildimo paryi israelmi cuuminoototi. ⁵ Jilli faacuumivatoti iiciubo. Juda cuumiti doce mildimo oovocafutuuihi, bu doce mildimo Ruben cuumiti oovocafutuuihi, bu Gad cuumiti doce mildimo oovocafutuuihi, ⁶ bu Ase cuumiti doce mildimo oovocafutuuihi, bu Neftali cuumiti doce mildimo oovocafutuuihi, bu Manase cuumiti doce mildimo oovocafutuuihi, ⁷ bu Simeon cuumiti doce mildimo oovocafutuuihi, bu Levi cuumiti doce mildimo oovocafutuuihi, bu Isaca cuumiti doce mildimo oovocafutuuihi, ⁸ bu Zabulo cuumiti doce mildimo oovocafutuuihi, bu Jose

cuumiti doce mildimo oovocafutuuhi, bu Benjamin cuumiti doce mildimo oovocafutuuhi icano. Jaamo famooro ciento cuarenta y cuatro mildimou.

Ajashutimo Sesecehujefaño Ijiicucucinimo.

⁹Toonobuunati emeeciubo atyimeuhi ajashutimo miyaminaaco fanoojiinijeminaaototi, bu simiyaminaaototi, bu faajiva miyaminaaototi, bu faacuumivaototi icano. Jaamo julleeciniuhi aivoji icaga imegavi, bu Corderobadi iicaabo imegavi icano icaumoco. Jaamo aivo ajashutino icaumo oovorautimo sesecehujefaño jicucucinimo tucujihunoco gaayiciniumo. ¹⁰Jaamo paryi famooro sefano neehicauhi:

Moocaani ihaivoji icagahalliri igiciniiboti, bu Corderobadi iicaaboti icano taajasu saahi, noomoro.

¹¹Jaanaa paryi Moocaani toomominaa jullelleeciniuhi Moocaani aivoji icagahallidi, bu quillahutohallidi, bu igueenemehejedino iicaumohallidi icano. Jaamo toga imega jiinijehallivi ajavucamaaiumoro Moocaanico iimomo nuuhi:

¹²iFine! Cahacisucu, imo, bu gaaja, bu imino monoono, bu bocigo, bu mitya, bu sefa icano.

Jaafa Moocaanidi icahi fahijivaro icano. Fine, noomoro.

¹³Jaanaaca quillahutooboti saafi uco dilluuihi: ¿Miijoho jino jito sesecehunofaño ijiicucucinimo, cuucati asaamo? nooboro.

¹⁴Jaaneguiiha uujoho nuuhi: Aivojiibo iiro gaajahi, nooboro.

Jaaneguiiha uco nuubo: Jito jino sihidi jeevano iidaasufañodi afatyomo. Jaamo imifiiutimoco Corderobadi iicaabo tiijeri iimitusucuumo.

¹⁵Jaamaño Moocaani aivoji icaga imefeeneri icamo. Jaamoro cuujehachuta, fucuhachuta icano diiboco itemplojafaño jeecivomoro icahicahi. Jaamoco ihaivoji icagahalliri igiciniibo imityaguino ficuji; ¿Milli icatimo iicacui?

¹⁶Jaamo ajebari, bu adufirari icano idaasuno icacujitihi, bu nihiba ihaiguucuri diitoco jigasucujitihi, bu jinejeba aiguucu diitoco idaasuno moonicujitihi icano. ¹⁷Oono miiro Corderobadi iicaabo aivoji iicagafeeneri iicaabo diitoco teemeji ovejamico motoomonicibadi. Jaaboro fiivoco aacino nifaihunojaagovi diitoco satyejiibo, bu jaamo taafiraco Moocaani buusuji icano.

Niino Sisitaaco Isinaayuuno.

8 Jaanaaca Iorderobadi iicaabo niino sisitaaco isinaayuuno ticovovi niquejefaño lliivi icauno fine sano nihiba oovofeene ticovoviro.

²Jaadi atyimeuhi sahuse juugahuseti miimisiici idiino Moocaani toomominaa Moocaani imefeeneri julleecinomoco. Jaamoco iticovoocivi aciuno miriicunoco. ³Jaanobuunati saaubo sifi Moocaani toomominaafi maaniguiijino jigasutahiillu oro eetavotahilluma. Jaaboro jeevobuje imegavi julleevuhi. Jaaboco saafi aciuihi sihidi maaniguiijinoco paryi Moocaanita iicamo Moocaanima ihiimaanoma sano Moocaanico ihaciqui. Jaaboro jeevobuje oro eetavotahallivi ificuuboro ijigasucui. Oono ihaivoji icaga imega iicabujehallivi. ⁴Jaano imaaniguiijinoco ijigasuumo aimuufai itoomominaafi usefañoti Moocaanijaagovi fuuhi sano Moocaanita iicamo diiboma ihiimaanehejema. ⁵Jaadi bu imaanijigasuta illuco itoomominaafi iciuboro tubuje ciijigaicuneri tohilluco agahafusuuboro jiinijehallivi ganicaruihi. Jaaneri sihidi sisiimi icauihi, bu jiinije sefano guubuvusuuihi, sihidi namebahicauno, bu jiinije sefano maryibauhi icano.

Miriicuno.

⁶ Jaanaaca sahuse juugahuseti miimisiici idiino iicaumo Moocaani toomominaa iticovovi miriicunoma iicaumo imibaivuuhi iguisiqui.

⁷ Jaadi saafi ticoniuihi imiriicuco iguisiubo. Jaano ticovovi jiinijehallivi aifuuno nifaihu ifigatyono guisiyinobadi ejeevano, bu cijigai icano sano tiijohoma caisecinino. Jaaneri samañooje jiinije jigauhi. Jaabadiro bu imohonoti samañoono jigauhi, bu faijihuti icano.

⁸ Jaanaa allivioobo imiriicuco iguisiuno ticovovi ifabaibadi jeevano jiganoro muuaifaño acutuuihi. Jaaneri samaño muuai tiijohoti minifutuuihi.

⁹ Jaaneri tumuuaijefaño iicaumoti samañooto guiyeveuhi, bu tolliro cijigai meeneneti samañoono finiuihi icano.

¹⁰ Jaanaa allivioobo imiriicuco iguisiuno ticovovi ajashutino meecirigai niquejefañoti acutuuihi nifotociniiboro teehinoti samañoonohallivi, bu pisirigañoti samañoonohallivi icano. ¹¹ Jaabo momou Namita onoobo. Jaaneri paryi nifaihunoti samañoono namitati minifutuuihi. Jaaneri sihidi miyaminaa chuumuuihi inifaihu faafaño iminifutuuneri.

¹² Jaanaa allivioobo bu imiriicuco iguisiuno ticovovi nihibati samañoobo jabaavuuhi, bu fucuooboti samañoobo jabaavuuhi, tolliro bu meeciriti samañoobo jabaavuuhi icano. Jaamaño diitoti samaño achicicuutihi. Jaamaño cujyeti samañoono achicicuutihi. Jaabadiro fucuti samañoono achicicuutihi.

¹³ Jaadi emeeciubo atyimeuhi saafi Moocaani toomominaafi niquejefeenedi ciimimi mogaaje agahafobadi fuuhi, sefano jilli nooboro: ¡Ayii! Idaasucani jiinijehalliri iicamo icaji siino miimisiici, saafi idiinehiica iicamo Moocaani toomominaa imiriicunoco iguisidi, nooboro.

9 Jaanaaca bu allivioobo imiriicuco iguisino ticovovi bu atyimeuhi saafi meecirigai jiinijehallivi aacutuuno. Jaaboco iñihicuno oji llaveque aaciunoco atyimeuhi. ² Jaahojico afaayiciuneri tohojifañoti sihidi aimuufai inuuihi gaicuhai aimuufaibadi. Jaahoji aimuufairi iinuuneri nihibaco fabaacuuihi. Jaaneri jiinije civutuuihi. ³ Jaano toono ihaimuufaifañoti inuumo sihidi chahacami jiinijehallivi gahafomoro. Jaamo mityaco gaayiciuhi iniiqui oono jiinije juuvemi iicabadi. ⁴ Jaamoco tajiibaubo: Jiinije faijihuco imitino momoonidino, bu jinejebaco, imohobaco icano. Jaanoti idiimocoro miyaminaaco Moocaani gaajatari ihimecunoti agaajaratimoco momooni, nooboro. ⁵ Jaaruumo miyaminaaco muchuumusudino jilliro sahuse nihibava ticovovi mahaivuvusu, nooboro. Jaamo iniino aivo juuvehu iniino aivobadi jeevauhi. ⁶ Jaasumi miyaminaa guiyeveque guineji. Jaarumo atyimejitihi. Iguiyevequi moonirumedi guiyeve chahaji.

⁷ Jaamo ichahacami caballomico aamocasivi ifeequi imibachunicibadi jeevauhi. Jaamo nigainohalliri oro chaahimigabadi jeevano icauihi ihmeneu miyaminaa imenebadi jeevauhi. ⁸ Jaanoti imeebaiguino gaigoomi meebaiguinobadi jeevauhi. Jaanoti igaiño jicu igaiñobadi jeevauhi. ⁹ Jaanoti imeehene kuhufunuuihi jigaiñomeehunobadi. Jaanoti bu ijijecuno sefano guubuvusuuihi aamocasivi ofoomo sihidi caballomi icarronoco iguicino uguubuvusuunicibadi, ¹⁰ bu ibuhuno juuvehu ibuhunobadi jeevauhi njequeneti ituunoma iicauno icano. Jaamo toono ibuhunofaño imitya icauihi miyaminaaco sahuse nihibava ticovovi aivono imooniqui. ¹¹ Jaabo ichahacami aivojiibo toono iñihicuhoji abajaabuu. Jaabo momo hebreomi

iijiri Abadon onoo. Jaanoti griegomi iijiri Apolion onoo. Jaanoti moojiri Finisuminaafi onoo.

¹² Jino imegao idaasu fatyuuhi. Jaarunaaca icanehiica minooci.

¹³ Jaano allivioobo imiriicuco iguiisuno ticovovi guubuuhi Moocaani imegari iicano ijeecivobuje oro eetavotabuje inicuno igueenemeheje iicaunofaṇoti diiboco unuunoco: ¹⁴ Sinaayu oono igueenemehejedimo iicaumo imitino toomominaa Eufate onoomuaajiniri isisicinimoco, noonoro.

¹⁵ Jaamo diito igueenemehejedimo iicaumo sinaayucafutuuihi miyaminaati sanoodimoco iguijeniqui. Jaamo toono horavi, tufucuvi, bu tonihibavi, bu toficabavi icano tolli imooniqui ifiivusumo. ¹⁶ Jaamo amocasiminaa caballomihalliri iicaumo oovo doscientos millones ticovovi iifutuunoco guubuuhi.

¹⁷ Jilli uujoho icaballomico gajafeenedi atyimeuhi. Jaamohalliri iicaumo ifeeyijehallivi cuhufono jigaiṇo meehu tifaṇo, bu atyivano, bu guiguivano icaneri tifaucininoma iicaunoco. Jaanoti icaballomi nigainou jicu nigaijadi jeevauhi. Jaamo iijinoti ciijigai, aimuufai, azufre icano ineehicauihi. ¹⁸ Jaaneri miyaminaati sanoodimo guijeveuhi toono minooci, sano idiino icano imiti diito iijinoti ineehicauneri. Jaano toono minooci, sano idiino iicano imiti ciijigai, bu aimuufai, bu azufre icano. ¹⁹ Jaamo diito icaballomi mitya icauhi iijinofaṇo, bu ibuhunofaṇo icano. Jaanoti ibuhuno nigacino jiinimo nigainobadi jeevauhi. Jaaneri imitino miyaminaaco moonihicaumo.

²⁰ Jaanoti sanoodimo diitoco idaasuno omoonicuurunoti guijevetimo atajaumo iimitico jeevesuutihi. Jilli suufenitimo imitino gajamico, bu oro, plata, bronce, guisiba, imoho icano eetavota ijimico icano jeevicehicauihi; jaamo ihijimi atyimetimo, bu guubutimo, igotimo icamoco. ²¹ Bu tolliro suufeniutimo sitaaco agaicaunoco, bu agaibaninoco, bu gaigoomima imitinono iicanehejeque, bu ananivanehejeque icano.

Moocaani Toomominaafi Aamegayima Iicaabo.

10 Jaadi atyimeuhi bu sifi Moocaani toomominaafi sihidi jeevaabo, aimuufairi miniciniibo, inigaihalliti tihi cajetaciniuboma niquejefaṇoti iniituunoco. Jaabo ime nihibabadi achiciniuhi, bu idiino ciijigai imahacinobadi jeevauhi. ² Jaabo usefaṇo aamegayi faayicinihaamegayi icauhi. Jaabo imiyanaagotihaico muuaihallivi ficuuihi, jaanoti inaninaagotihaico jiinijehallivi ficuubo icano. ³ Jaaboro sefano coovadiivuubo oono jicu sefano iniigonicibadi. Jaano ticovovi sahuse juugahuseti miimisici idiino sisiimi ojiuhi. ⁴ Jaamo isiisimi oojuunoco uujoho caatiniqui mooniunaaca sifi niquejefaṇoti uco unuunoco guubuuhi: Jilli lliivi guubunici oono sisiimi ihiimaanoco. Jaaboro caatinidino, unuunoco.

⁵ Jaanaaca Moocaani toomominaafi jiinijehallivi, bu muuaihallivi icano ujulleeciniubo imiyanaagohuseque caamo niquejejaagovi gaṇiyyiciuhi.

⁶ Jaaboro fahijivaro iicaabo niquejeque, jiinijeque, muuaiṇooco, bu paryi tonehejefaṇo iicamoco icano ifiivusuubo momofaṇodi miyaano iicanoco nuuhi: Tusumi mihicacuuihi. ⁷ Niinoobo imiriicuco iguiisicudi Moocaani esamaaje agaajarahicacino icacuui ijeecivominaa, ihiimaaminaa iicamoco unubadi, nooboro.

⁸ Jaanaaca niquejefañoti uuma ihiimaauno siino bu uco nuuhi: Foobo dihicito jaadi Moocaani toomominaafi johono muuaihalliri, jiinijehalliri icano ujulleeciniibo usefaño iicaaame afaayicinihaamegayico, nooboro.

⁹ Jaanegui diibojaa ufuuboro toohaamegayico diiboco dilluui uco ihaciqui.

Jaanegui uco nuubo: Ifaaji machu. Jaano diijifaño imono naamejino iimihubadi. Jaanoti dihibafaño faafaityejino, nooboro.

¹⁰ Jaaneguiiha diibo usefañoti toohaamegayico iiciuboro machuui. Jaano taajifaño imiino iimihu imobadi. Jaanoco amachuuno taabafaño faafaituui. ¹¹ Jaadi uco nuumo: Siino diibogo ajashutino cuuminoditi, jiinijeminaaditi, siijiminaaditi, bu aivojitoditi icano Moocaani onoonoco, noomoro.^e

Miimisiici Moocaaniti Ihiimaamisi.

11 Jaadi uco aciumo noofajicuco metrobadi iicanoco. Jaamoro uco nuuhi: Gañiivo. Oono Moocaani templojaco doovo, bu ijeecivobujeque doovo icano, bu doovo, ¿naa minoodimo tomañovi ejeecivehicamo miyaminaa icahi? ² Jaanoti idiinocoro igoohasico deavedino tohasi siicumijeo miyaminaaguiiharucu iicano. Jaamo diito tuucuumi imino cuumico quicuji cuarenta y dosdi nihibava ticovovi. ³ Jaasumi uujoho tajiibogominaatisico galluji uujoho onoonoco ijiibeguequi mil doscientos sesentadi fucuva ticovovi, civochehujefaño jiicinimisico.

⁴ Jaamisi diitisi Moocaani jiinije Aivojiibo imega icahooci olivohooci, bu cuugahu ficuta miihiicuuci icahicuci iicanobadi jeevamisi. ⁵ Jaamisico saatoho imitino omoonigohachijiji diitisi iijiti cijigai iineeji diito iminaaco ijigasiqui. Toli guijevejimo paryi diitisico imitino imooniqui omoonimo. ⁶ Jaamisi jiinijehallivi Moocaaniti ihiimaanohachuta aigotino iicaqui niquejeque afabaacujino mityama icahi, bu tolliro nifaihuco tiijohoti iminiyujino mityama icahi, bu jiinijeminaaco idaasuno fanoovari imugusumi omoonijino mityama icahi icano. ⁷ Jaamisi idudicamaajeque iimivucuudi iñihicuubo oono iñihicuhojifañoti asaaboro diitisico moonivaji. Jaabo diitisico iguinoniboro gaicaauji. ⁸ Jaamisi chuumuhuno tuucuumi sihidi ejeevacuumi, Mohaivojiiboco etetecuucuumi jiilhaifaño acaji. Jaacuumi Sodoma, Egipto icanovi oovicinihi. ⁹ Bu jaamisi ciirajitihimi mifucuci, safucu, bu sifucutifeenedi icano icajimisi. Jaamisico faaboho miyaminaa, faacuumiva miyaminaa, faajiva miyaminaa, bu faajiinije miyaminaa icamo ihatyimequi. ¹⁰ Jaamisi iguijeveneri jiinije miyaminaa sihidi imobaaji. Jaamo imo imo iicamoro sinehejeque fahigovavi acicasiji; Oono diitisi Moocaaniti ijiibeguehicamisi diitoco idaasuno omoonihicamisi iguijeveneri. ¹¹ Jaarunaa mifucuci, safucu, sifucutifeenedi icano nijequeti Moocaani diitisico siino buheetesuji. Jaamisico paryi aatyimemere sihidi iguetejimo. ¹² Jaanaa diitisico sefano niquejefañoti: Juu caamovi masaa, unuunoco guubumisi.

Jaaneguiiha caamo fuumisi aimuufaifeenedi. Jaanoco iminaa atyimeuhi. ¹³ Jaano ticovovi aivo sefano jiinije amaryibauneri tuucuumiti fahuseecijaava iicamañoti sajaaro callajaavehicaui. Jaabadiro

tuucuumiviro ajashutino iijano callajaavuui. Jaaneri siete mildimo miyaminaa guijeveui. Jaaneri saato ho iguituumoro Moocaani niquejefano iicaaboco imuui.

¹⁴ Jino alliviono imiti fatyehi. Jaano allivio imiti goovajino asaano.

Niino Miriicuco Iguisino.

¹⁵ Jaadi niinoobo Moocaani toomominaafi imiriicuco iguiisuno ticovovi sefano guubuvusuuno niquejefano ajashutimo jilli unuuno:

Jiinije aivojino Mohaivojiibedi, bu Iristodi icano icacuui.

Jaabo tajiibaji fahiijivaro, noomoro.

¹⁶ Jaanaa veinticuatrodimó quillahuto Moocaani imefeeneri ihaivoji icaganohalliri iicaumo jiinijehallivi ajavucamaaiumoro Moocaanico imuui, ¹⁷ jilli noomoro:

Ico mihimehi Moocaani sihidi mityama idiicaaboco.

Ijoho idiicaaboco, bu idiicaaboco, bu asaajiiboco icano,

bu dimityaco agaayiciiboro atajiibacuumaño icano.

¹⁸ Miio jiinijeminaa dijaa sifiiratehi. Jaarunofano ijoho adaamijifucu, bu uchuumucuumoco udugaacujifucu icano gasecuui. Jaasumi dijeecivominaa ijoho onoonoco ijiibeguehicamoco, bu iidiro icahicamoco, bu dimomoco obociguehicamoco icano sabadiro sihidi ejeevamehejeque, bu sihidi ejeevatimehejeque icano adaadujifucu, bu tolliro jiinijeque ifinisuhicamoco ifinisujino icano, noomoro.

¹⁹ Jaasumiro niquejefano Moocaani temploja faayicicafutuui. Jaaneri Moocaani unuunohaameque ificuuba cajonbaco atyimeui. Jaasumiro sisiimi sihidi namebauhi, jiinije ñihicuno guubuvusuui, bu sisiimi giiriribauhi, bu jiinije sefano maryibauhi, bu guisiyinobadi ejeevano sihidi sefano aifuui icano.

Ñihicuubo Dragon Onoobo, Gaigo Icano.

12 Jaanobuunati niquejefano jabafirano ifuvusuuno: gaigo nihibari imibocinigobadi aricuno ifuvusuuno, fucuo nihibahalliri julleecinigo, docedimo meeciriri ichaahimiga eheetavocinigaco javucinigo. ² Jaago oovago icago isemevaqui aiveveneri gaibahicauhi. ³ Jaanobuunati bu siino niquejefano ifuvusuui: dragon ñihicuubo tifaibo, sahuse juugahuseti miyiici idiino inigainoma icaubo, bu fahuseecidino inicuno, bu inigaino ticovoocivi ichaahimiganoma icaubo. ⁴ Jaabo ibuhuri samañooto meecirico niquejefanoti ubuutuuciuboro jiinijehallivi gañiui. Jaaboro isemevaqui omoonigo imegavi julleevuubo diigo eseemevasumiro tooseque iduui. ⁵ Jaago gaifi seemeneque seemevauhi. Jaabo jiinijeminaaco sefano tajiibaji jigaiñohiri iicanicibadi. Jaabo niquejefano satyocafutuui Moocaani aivoji icagahalliri iicaabojaago. ⁶ Jaanoti igaigo gaauhi sicaihigo icahigovi Moocaani diiguedi imibachuhigo tahi diigoco machuco ihaciqui mil doscientos sesentadi fucua ticovovi.

⁷ Jaanobuunati niquejefano idragon fuui iytoma. Jaamoma moonicasuubo Moocaani toomominaa aivojiibo Miguel onoobo iytoma.

⁸ Jaaruubo idragonco sahigotiro guiinoniuimo, bu tahi niquejefano diito iicajirumaño samaño chahauhi. ⁹ Jaamaño diibo sihidi ejeevano dragonco baavi gañiuimo, johono siicijeo jiinimo oono imomo iji, Satanas iicaaboco. Jaabo jiinijeminaaco abañihicaaboco iytoma baavi jiinijehallivi gañiuimo.

¹⁰ Jaanaa guubuuhi sefano niquejefañoti unuunoco: Moocaaniti asaano taajasu, bu imitya, bu ihaivoji icano, bu Icristo mitya icano gasecuuhi. Miïro baavi gañicafutucuubo Moocaanico monahabomihallivi imitino ijïibeguehicaabo fucuhachuta, cuujehachuta icano. ¹¹ Jaaruuboco monahabomi guinonicuuhi Corderobadi iicaabo tiijohofañodi, bu Moocaani jïibogo miyaano iicanoco ijïibeguehicaneri icano. Miïro ifico gaijiutimo, bu guijeveque iguihiutimo icano. ¹² Jaaneri niquejefaño iicamo imo imo icahi, bu amïihai tahi paryi mihicamo icano. Jaanoti idaasucani mihicaji amïihai jiinijehalliri, bu muuainofaño mihicamo icano. Miïro oono iji tahigo sihidi isifiiratooboro niitehi gueenene iicajitinoco agaajaaboro.

¹³ Jaabo idragonco agañiunoma iicaabo oono gaifico eseemevaugoco bucasiubo. ¹⁴ Jaanegui diigoco ciimimi mogaaje jïjecuucico aciumo jiinimobadi iicaaboti tehesino igaaqui sicaihigovi diiguedi iimibachuuhigovi. Tahi diigoco machuco ihaciqui mificabaci, bu saficaba, bu sificabatifenedi icano ticovovi. ¹⁵ Jaago dojicuti ijiinimobadi iicaabo iijifañoti nifaihuco galluui muuaiti ifiivotonoro diigoco ibecasuqui. ¹⁶ Jaarunofaño jiinije diigoco amusuui, idragon iijifañoti agalluufaihuco aaduneri. ¹⁷ Jaanoma iicaabo diigojaa sihidi isifiiratuuboro fuuhi diigo iyaachimihai aatyuvuudimo sanoodimo Moocaani tajiibaco imino omoonimoro, bu Jesucristo jïibogoco jeevesutimo iicahicaumoma ihamocasiqui.

ñihicumisi.

13 Jaadi muuai jiinigaibaahohallivi ujulleeeuubo atyimeuhi ñihicuubo muuaifañoti inuuboco. Jaabo nigainou sahuse juugahuseti miyiici icano, bu iniicuno fahuseecidinou icano. Jaano iiniicuno iticovoocivi ichaahimiganoma icauhi, bu inigainohallivi caatiniciniuno Moocaaniditi idicuno oonono momo icano. ² Jaabo ñihicuubo jicubadi ejeevaubo, tihaiño jeeji tihaiñobadi jeevauhi, bu iji leon iijibadi jeevauhi icano. Jaaboco idragon imitya, ihaivoji icaga, sihidi boci iji icanoco aciui. ³ Jaabo ñihicuubo nigaiti sahiti icauno itujaavo diiboco muchuumusujibadi iicauno. Jaaruno diiboco buuhi. Jaaneri paryi jiinije miyaminaa ajabafitiuumoro diiboco miyaavuguui. ⁴ Jaamoro idragonco cahacisuumo diibo ñihicuuboco mityaco aaciumaño. Jaabadïro bu ñihicuuboco cahacisuumo jilli noomoro: ¿Miijoho fine jaani ñihicuubobadi jeevahi? ¿Miijoho fine diiboma amocasijirahi? noomoro.

⁵ Bu tolliro diibo ñihicuubo Moocaaniditi idicunoono ihiimaauono jaabicicafutuui cuarenta y dosdi nihibava ticovovi tolli imooniqui.

⁶ Jaamaño ticovaubo Moocaaniditi imitino ihiimaaboro imomoco idicunoono nuuhi, bu diibo iimihijati, bu niquejefaño paryi iicamoti icano. ⁷ Tolliro bu ajaabicuuboro jilli ifiniciubo Moocaanita iicamoma amocasiuboro diitoco iguiinoniunoco. Bu gaayiciubo mityaco fahigova miyaminaahallivi, bu faacuumivahallivi, fanoohiji miyaminaahallivi, bu faajiinije miyaminaahallivi icano. ⁸ Jaabo diibo ñihicuuboco cahacisuumo paryi jiinijehalliri iicamo oono jiinije ifiivuunotiro diito momono Corderobadi iicaabo agaicaaucufutuubo fiivohaamefaño acaatinirautimo.

⁹ Amïihai nohojima mihicamo jinooico imino muguubu. ¹⁰ Sitaaco civojafaño asatyomo, bu tolliro civojafaño satyocafeteji. Jaanoti bu niisugari sitaaco agaicaaumo, bu niisugari gaicaaucafeteji. Jilli iicaneguiha Moocaanita iicamo imiyaavogomoro ijaabicihicaqui.

¹¹ Jaanobuunati sifi iñihicuubo jiinjefañoti asaaunoco atyimeuhi. Jaabo iiniicuuci cordero iniicuucibadi jeevauhi. Jaaruubo dragonbadi iimaahicaui. ¹² Jaabo iticonio ñihicuubo mityaco paryi gaayiciuhi, diibo iticonio ñihicuubo imefeenevi. Jaaboro jiinijeque, bu toojehalliri iicamoco icano tajiibaubo iticonio ñihicuubo oono sihidi ejeevauno itujaavo ubuhuuboco icahacisuqui. ¹³ Bu tolliro sihidi ejeevanehejeque, bu niquejefañoti miyaminaa imefeenevi jiinijehallivi ciijigaico iniitusunehejeque icano. ¹⁴ Tonehejeque diibo iticonio ñihicuubo imefeenevi omoonihicaunofeenedi jiinije miyaminaaco bañiubo. Jaaboro diitoco tajiibaubo diibo iticonio ñihicuubo niisugari agaviriicunoma iicauruubo ubuheeteubo ijico iheetavequi. ¹⁵ Jaadi diibohallivi asaauno ñihicuuboco mitya acicafutuui iticonio ñihicuubo ijico eetavuuboco ijeebiico aaciiboro ihiimaasuqui. Jaaboco iimotimoco igaisiraicisuqui. ¹⁶ Jaabadiro bu tajiibaubo paryi miyaminaaco ihoovoco imiyanaagohuseneti, bu ihimecunoti icano ificuuqui; sihidi ejeevatimoco, bu sihidi ejeevamoco, bu idaasumehejeque, bu sihidi inihibamima iicamehejeque, bu miyaamoco, bu jiovotoco icano. ¹⁷ Jaadi mihihiñooba ticovono naajejitihí diibo oovotama achahamo. Jaano toono diibo iñihicuubo momo, bu imomo oovo icano. ¹⁸ Jaano jino gaajacoro esuhi. Agaajaabo jino iñihicuubo oovoco gaajaci; jino saafi miyaminaafi oovota. Jaano jino seiscientos sesenta y seis.

Ciento Cuarenta y Cuatro Mildimo Amasivano.

14 Jaanobuunati emeeciubo atyimeuhi Corderobadi iicaaboco Sion cuumbaihalliri julleeciniuboco. Jaaboma iicaumo ciento cuarenta y cuatro mildimo miyaminaa ihimecunoti Corderobadi iicaabo momo, bu Caani momo icano acaatiniciniumo. ² Jaadi guubuui niquejefañoti sihidi teehiguiisi uguubuvusunicibadi, bu sisi sefano igiiriribanicibadi icano uguubuvusunoco. Jaanou sihidi miyaminaa iharpanoco oojisunicibadi jeevauhi. ³ Jaamo bohono masijico masivahicaui Moocaani aivoji icaga imegavi, bu igueenemehejedimo iicaumo imegavi, bu quillahuto imegavi icano. Jaajico mihihiñooba aivo gaajahicautihi idiimoro diito ciento cuarenta y cuatro mildimo iicaumo jiinije miyaminaafeeneti atajasucafutuumoro. ⁴ Jaamo diito gaigoomivi ijivuutimo. Jaamaño mihinivatimo iicaumo. Jaamo Corderobadi iicaabo dojicuti feehicahi diibo fahigova ofoohigovi. Jaamo taajasucafutuuhi. Jaanoti Moocaani, bu Corderobadi iicaabo iicamisi gaajacuhi sihidi atajasucafetejinoco. ⁵ Jaamo Moocaani imegavi mihinivatimo iicaumaño diitofaño bañifira atyimerautihi.

Moocaani Toomominaa Miimisiici, Saafi Idiino Ijiibogono.

⁶ Jaanobuunati atyimeuhi Moocaani toomominaafi niquejeguinodi ifinijitino taajasujiibogoma icaabo gahafooboco. Jaanoco jiinjeminaaco, bu famoovaaco, bu faajiva miyaminaaco, bu faacuumiva miyaminaaco icano ijiibeguequi. ⁷ Jaabo sefano nuuhi: Moocaanico mihiguimoro diiboco mihimo. Miho jino tufucu gasecuui iimitihalliti jiinjeminaaco idaasuno omoonijifucu. Jaaneguiha niquejeque, bu jiinijeque, bu muuainooco, bu pisirigañooco icano ifivusuuboco mihimo, nooboro.

⁸ Jaanobuunati bu sifi saauhi jilli nooboro: Acutucuuno, acutucuuno sihidi ejeevacuumi Babilonia cuumi paryi jiinjeminaaco ihajevari iguiricavusumaño, nooboro.

⁹ Jaanobuunati niinoobo saauhi sefano jilli nooboro: Oono ñihicuuboco, bu ihijico icano, imomoro ihoovotaco ihusevi, bu ihimecuvi icano ificuumumoco. ¹⁰ Moocaani ñihicuno mooniji. Jaamo idaasuno moonicafeteji ciijigai azufrema iicaneri Moocaani toomominaa imefeenevi, bu Corderobadi iicaabo imefeenevi icano. ¹¹ Jaano diitoco idaasuno omoonino aimuufai icaji fahijivaro ufucuro finiratio fucuhachuta, cuujehachuta icano jaguisisuratino diito ñihicuuboco, bu ihijico icano acahacisumoco, bu imomo oovoco agaayicimoco icano. ¹² Jilli iicaneguiiha Moocaanita iicacuumo, diibo atajiibanoco omoonimo, bu Jesuco jeevesutimo iicamo icano jaabicima iicaqui.

¹³ Jaanaa guubuuihi niquejefañoti: Jinooco caatini, noonoro uco unuunoco: Jisumiti imicani icajimo Aivojiibo Cristo imiyaavogomo iguijeveme. Jihi tolli, noobo Moocaani Gaija: idudicamaajeti jaguisijimo, bu imino omoonihicanoti gaajaveechujimo icano.

**Basuta Ujusicunoco Mihicinicibadi Moocaani
Niinofucu Naniji Iimifiimoco Imino Imooniqui, Jaanoti
Iimitifiimoco Imitino Imooniqui Icano.**

¹⁴ Jaadi emeeciubo atyimeuhi aimuufai seseeneque. Jaanohalliri giciniubo saafi miyaminaafi seemenebadi jeevaabo. Jaabo ichaahimiga orogaco inigaihaliivi javuciniuhi, bu meeyuhu sijjevahuco gaayiciniuboco. ¹⁵ Jaanaa templojafañoti saafi Moocaani toomominaafi inuui. Jaaboro sefano nuuhi oono aimuufaihalliri igiciniuboco: Dimeeyuhuri quiticiibo basuta noovataco diicicu tufucu mihicacuui. Jino jiinije basuta noova tifaicuui, nooboro.

¹⁶ Jaaneguiiha aimuufaihalliri igiciniubo imeeyuhuco jiinijehallidi iguiyiciuboro jiinije basuta noovataco iciuhi.

¹⁷ Jaanobuunati bu sifi Moocaani toomominaafi inuui niquejefaño iicaja templojafañoti, tolliro bu ihusefaño sijjevahu meeyuhu ichuma.

¹⁸ Jaanaaca bu sifi Moocaani toomominaafi Moocaani jeevobujejaagoti saauhi ciijigaihallivi mityama iicaabo. Jaaboro imeeyuhu sijjevahuma iicauboco sefano nuuhi: Disijeva meeyuhuri quiticiibo diici jiinije baacuco oono icivucunoco, nooboro.

¹⁹ Jaanegui diibo imeeyuhuco jiinijehallidi iguiyiciuboro iciuhi jiinije baacuco. Jaaboro ajashutiba Moocaani sifiira nitibafaño gañiuihi imahamicafetequi. ²⁰ Jaanoco cuumiti buhigovi mahamicafutuui. Jaano initibafañoti tijoho ucuuno trescientos kilometrohachuta ifutuui fahigovavi, bu ifaicuva ifutuui caballomi ujulleecinimo iijihachuta icano. Miyaminaa tijoho eneejiruno baacutofaihuviro oovicafutuui.

Niino Imiti Iicajino.

15 Jaadi bu siino atyimeuhi niquejefaño iifuvusuuno jabafiiranoco. Jaanou sahuse juugahuseti miimisiici idiino Moocaani toomominaa iticovoocivi niino idaasuno omoonijnoma iicaumo. Jaamo imivusuhi Moocaani sifiirataco.

² Tolliro bu atyimeuhi muuai vidriobadi jeevano ciijigaima icano foovono sinaagonovi iifuvusunoco. Jaanojiniri jullelleecinimo Moocaani aaciuno iharpanoma johono ñihicuuboco, bu ihijico icano iguiinonimoro, bu diibo momo oovotaco agaayiciutimo. ³ Jaamo masivahicauhi Moocaani

jeecivominaafi Moise masijico, bu Corderobadi iicaabo masijico icano jilli noomoro:

Aivo ajashutino, olli jeevatino paryi ijoho edetavono Aivojiibo Moocaani sihidi imityaabo. Jaano diica aivo tiqvevehi, bu aivo miyaano icano, ijoho jiinije miyaminaa Aivojiibo idiicaabo.

⁴ ¿Miiijoho bu ico, Aivojiibo, ñihicugotimo icajirahi? Paryi famooro ico cahacisuji. Miiro ijoho idiiboro imihinivatiibo. Jaamaño fanoojiinije miyaminaa asaamoro ico imeji, aivo ijoho imino omoonino aatyimecafotomaño, noomoro.

⁵ Jaanobuunati emeciubo atyimeuhi niquejefañoti temploja iimimañoma iicauja afaayacafutuunoco. Tomañovi tajiiba guisibabujecico ificuhicaumaño. ⁶ Jaamaño iimimañoti inuumo diito sahuse juugahuseti miimisiici idiimo Moocaani toomominaa Moocaani idaasuno omoonijnoma iticovoocivi iicaumo. Jaamo imichehuje, aricuchehuje, mihinivatichehujeñaño jiiciniimo. Jaamo oro niivigaimeeheneri ifeeyijenehallidi siyiyiiciniuhi. ⁷ Jaamoco igueenemehejedimo iicaumoti saafi aciuihi iticovoocivi oro guirihillunoco. Jaanofaño Moocaani fahiijivaro iicaabo sifiira gahaficininoma. ⁸ Jaasumiro iimimaño onoomaño aimuufairi gahafuuihi Moocaani sihidi ejeevano, bu mityati icano asaano. Jahigo miihañoooba jicafutuujitirahi oono sahuse juugahuseti miimisiici icano iicaumo Moocaani toomominaa iticovoocivi Moocaani idaasuno omoonijnoco asatuyumo toonoco omooniumo imivuutinhachuta.

Moocaani Sifiira Guirihilluno Aamitaditi Ijiiibogono.

16 Jaanaa guubuuihi templojafaño iicano iimimañoti Moocaani toomominaa sahuse juugahuseti miimisiici idiimo iicaumoco sefano unuunoco: Mofoomoro jiinijehallivi mutucaruto toono sihidi ejeevano Moocaani sifiira iguirihillunofaño iicanoco, noonoro.

² Jaaneguiiha diitoti saafi ticoniuihi jiinijehallivi iguirihillufaño iicaunoco utucaruubo. Jaaneri paryi miyaminaa oono ñihicuubo oovotaco agaayiciumoco, bu ihijico iimuumoco icano fiivuuno idicuno ciinisino sihidi aivonoono.

³ Jaanaa allivioobo bu iguirihillufaño iicaunoco muuaiñoñaño tucaruuihi. Jaaneri inifaihuno chuumuho tiiijohobadi minifutuuihi. Jaaneri paryi tumuuijefaño iicaumo chuumuuihi.

⁴ Jaanaa allivioobo bu iguirihillufaño iicaunoco teehinohallivi, pisirigaño hallivi icano tucaruuihi. Jaaneri inifaihuno tiiijohoti minifutuuihi.

⁵ Jaanaa guubuuihi diiboro unuunoco: Aivojiibo Moocaani, ijoho aivo imino omoonifiibo, idiimiibo icano. Jaabo idiicaabo, bu idiicaubo icano. ⁶ Miiro diito iidiro iicaumoco, bu dijiibogoco ihiimaumoco icano itiiijohoco agañiimoro guijeniuihi. Jaamaño ijoho jisumi diitoco tiiijohoco diisuhi tolli diito imogomaño, nooboro.

⁷ Jaanaa bu guubuuihi saafi Moocaani jeecivobuje iicauhigoti unuunoco: Jii, Aivojiibo Moocaani sihidi mityama idiicaabo, miyaanohalliti imino moonihi, nooboro.

⁸ Jaanaa allivioobo bu iguirihillufaño iicaunoco nihibahallivi tucaruuihi. Jaaboro inihibaco mityaco aciubo miyaminaaco ihaiguucuri ijigasquui.

⁹ Jaaneri paryi miyaminaaco ñihicuuno jigasuubo. Jaarunofaño iimitico jeevesuutimo, bu Moocaanico imuutimo icano; jilliro diibediti idicunoono iimaumo toono ñihicuunoono imitihallivi mityama iicaubediti.

¹⁰ Jaano allivioobo iguirihillufañ o iicaunoco oono ñihicuubo aivoji icagahallivi tucaruuhi. Jaaneri diibo aivoji jiinije cironoguiino minifutuuihi. Jaanaa miyaminaa aaivovomoro cufufono imicicifotomoro majaabicinibadiro diito inehejebanoco jimicamaaihicauhi. ¹¹ Jaarumo iimitico jeevesutimo omoonimoro Moocaani niquejefañ o iicaabediti imitinoo iimaauhi iicinisiino, bu aivono icanohalliti.

¹² Jaano allivioobo bu iguirihillufañ o iicaunoco sihidi ejeevamuuai Eufrate onoomuuaifañ o tucaruuhi. Jaaneri tumuui aiigatyuuhi jiihaiti iminifetequi tojiri aamijjaagoti jiinije aivojito isaaqui.

¹³ Jaadi atyimeuhi dragon iijifañoti, bu ñihicuubo iijifañoti, bu jihovo iimaaminaafi iijifañoti icano inuumoco, miimisiici, saafi idiimova iimitino gaijami jacucugamibadi jeevamoco. ¹⁴ Jaamo diitou iji gaijami sihidi ejeevanehejeque omoonihicaumo, bu jiinijeminaa aivojitoco iigaiyiicituumo Moocaani sihidi ejeevaaboma ihamocasiqui. ¹⁵ Jaanegui mehesicini uujoho gaajaciratino saaji nanivaminaafi asaanicibadi. Imicani icajiibo ifico imino imibachuubo gaachehuco imibachunicibadi. Jaabo icigatiibo iicanicibadi teemejiibo. Jaabo nucufeguecujitiibo sicaibo iicaabo iicanicibadi. ¹⁶ Jaamo diito imitino gaijami aivojitoco igaiyiiciuhi hebreomi iijiri Armagedon onoomañovi.

¹⁷ Jaanobuunati niinoobo iguirihillufañ o iicaunoco tucaruuhi sicaisituvi. Jaanaa niquejefañ o iicaja iimimañoti Moocaani aivoji icagati sefano ununo guubuvusuuihi: Fine imivocafutucuno, noonoro.

¹⁸ Jaasumiro sihidi namebauno, bu jiinije ñihicuno guubuvusuuihi, bu sihidi sisiimi icauhi icano. Jaaneri sihidi sefano jiinije maryibauhi jiinijehalliri miyaminaa iicanoti amaryibahicauno janaanicivi. ¹⁹ Jaaneri sihidi ejeevacuumi dujavavuhifeenedi minooci, sano idiino. Tolliro bu jiinije miyaminaa cuumino callajanamaaiuhi icano. Jaadi bu Moocaani sihidi ejeevacuumi Babilonia cuumiti asafutuuihi. Tuucuumico isifiirafaihuco ifayiiisuqui tuucuumijaago isifiiratuuboro agalluufaihuco. ²⁰ Jaaneri bu ifachugañ, bu ifabaino icano buuhicauno. ²¹ Tolliro bu miyaminaahallivi niquejefañoti guisibanobadi ejeevano aifuuihi. Jaanaa saba boci cuarenta kilodino icauhi. Jaanohalliti miyaminaa Moocaanico: Imitinoo, nuuhi jihishitineri diitoco idaasuno omooniuonohalliti.

Sihidi Ejeevano Ajevaminaagoco Ahaamino.

17 Jaanaa tajaago saaubo oono Moocaani toomominaa sifiira guirihillunoma iicaumoti saafi. Jaaboro uco nuuhi: Juu disaa, ico iifusuqui oono sihidi ejeevano ajevaminaago muuainohalliri igicinigoco ahaaminoco, nooboro. ² Miïro jiinijeminaa aivojito diigoma imitino icahicahi. Jaaneri jiinijehalliri iicamo diigo ajevafaihuri guiricavehicahi.

³ Jaanobuunati Moocaani Gaija uco iifusuunofañoti Moocaani toomominaafi uco sicaihigovi satyuuihi. Jahigo atyimeuhi gaigooce ñihicuubo tifaibohalliri gicinigoco. Jaabo ñihicuubohalli sihidi caatiniciniuno Moocaaniditi idicuno ononeheje, bu jaabo nigaino sahuse juugahuseti miyiici idiino, bu fahuseecidino iinicuno icano. ⁴ Jaago diigo diibohalliri igiciniugo jiiciniuhi tifaibai iicachehuri, bu atyivachehuco icano. Jaago imibaiquimaaciniuhi orori, bu iminoono guisiyineri, bu perlari icano. Jaago gaayiciniuhi oro guirihilluco iidicuneneri, bu ihajeva idicuri icano gatyuuci icahilluco. ⁵ Jaago imecuri caatiniciniuno itihiiño momo: Sihidi ejeevano Babilonia cuumi ajevaminaa seeji, bu paryi jiinijehalliri iicano iidicunoono seeji icano, onono.

⁶ Jaadi uujoho gaajaciuhi diigo Moocaanita iicamo tiijeheri, bu Jesu miyaabo iicanoco ijibeguehicaumo tiijeheri icano imo imo iicagoro guiriicavocinigoco. Jaanoco aatyimeuboro sihidi jabafiituuhi.

⁷ Jaaneguiiha Moocaani toomominaafi uco nuuhi: ¿Collihi daabafiitehi? Ico uujoho gaajasuji oono itihiino diigoco adaatyimene milli eneejirunoco, bu inihicuubo sahuse juugahuseti miyiici idiino, bu fahuseeci iinicono iicaabo diigoco ifiiseebeti icano. ⁸ Diibo inihicuuboco adaatyimeebe johono iicahiniibo. Jaaruubo jisumi chahacuhi. Jaaruubo siino inihicuhofifañoti saajiibo ifinicujihigovi efeejino imegavi. Jaaneri jiinijehalliri iicamo jiinije ifiivunotiro fiivohaamefaño imomono achahamo sihidiro jabafiiteji oono inihicuubo iicahiniibo, achahacuubo, siino asaadi.

⁹ Jimañeri onoonoco gaajama iicamo gaajaji: Miïro oono inigaino, sahuse juugahuseti mibaici idiino ifabaino iicanoco eneejiruno: Tobaijehalliri diigo igicinibajediti. ¹⁰ Jaayijere bu sahuse juugahuseti miimisiici idiino aivojito iicamediti eneejiruno. Jaamoti sahusedimo finicuuihi. Jaanoti saafi jino icahi. Jaanoti saafihiica gasetihi. Jaaruubo agasedi guenene icajitihî. ¹¹ Jaabo oono inihicuubo iicahiniibo, achahacuuruubo diitobuunati asaajiibo aivojiiboti iicaqui. Jaaboma ochodimo minifetejimo. Jaabo bu diito sahuse juugahuseti miimisiici idiino iicaumooboro. Jaadi feejiibo ifinicujihigovi.

¹² Jaanoti bu fahuseecidino iiniconoco adaatyimene fahuseecidimo aivojito iicajimoco onoono. Jaamo tajiibatihîica. Jaarumo sano nihiba oovoti aivoji iijico gaayicijimo sano oono inihicuuboma. ¹³ Jaamo diito aivojito sabadi ihiimaamoro imitya, bu ihaivoji icanoco oono inihicuuboco acijimo. ¹⁴ Jaamoro Corderobadi iicaaboma amocasijimo. Jaarumoco Corderobadi iicaabo guinononiji, miïro diibo aivojito Aivojiibo, bu tajiibaminaa Tajiibaminaafi icano iicamaño. Jaaboma iicamoco Moocaani ocoovaboro ichuhi. Jaamo diiboco jeevesutimo icahi, nooboro.

¹⁵ Jaadi bu siino uco nuubo: Johono muuaiñooco ajevaminaago tumuuaijehalliri gicinigoco adatyimemuuaije oono cuumino miyaminaa, bu fanoohiiji miyaminaa, bu jiinijeminaa icano. ¹⁶ Jaabadiro bu oono inihicuubo nigainohallivi fahuseecidino iiniconoco adaatyimene ajevaminagoco ijiihevenere sicaigoco jeevesujimo, bu tolliro diigo uucunoco uduumoro diigoco cijigaifaño jigasujimo icano. ¹⁷ Miïro Moocaani diito jeebiifaño ficuji diibo iimogobadi diito imooniqui. Jaamaño sabadiro ihiimaamoro ihaivoji iijico inihicuuboco acijimo Moocaani unuuno imivocafotonohachuta. ¹⁸ Jaanoti bu gaigooco adaatyimene oono sihidi ejevacuumi jiinije miyaminaa aivojitoco atajiibahicacuumiti onoono, nooboro.

Babilonia Cuumi Ifinijino.

18 Jaanobuunati atyimeuhi Moocaani toomominaafi sihidi mityama iicaabo niquejefañoti iniituunoco. Jaabo seseene jiinijeque achicuihi iharicuri. ² Jaabo sefano nuuhi: Acutucuuno, acutucuuno sihidi ejevacuumi Babilonia cuumi ijimi iijanotiro fiivutucuuno, bu fanoohimiti gajami iijanorucu, bu faaboho jooi agahafomo iidicufiimo, bu ijiihechufiimo icamo iijanurucu icano. ³ Miïro paryi jiinijeminaa tuucuumi ajevafaño imo imo icahicahi, bu jiinijeminaa aivojito diigoma ihajevari imitineheje icahicahi, bu jiinije naajeminaa tuucuumi imiti naajeteque omoonimoro sihidiro nihibamivahicahi icano, nooboro.

⁴ Jaadi siino guubuuhi niquejefañoti unuunoco: Amiihai tatyá mihicamo tuucuumiti miihino tuucuumi imitifañodi mihicadino, bu tuucuumico idaasuno omoonijino amiihaivi ifetedino. ⁵ Miíro tuucuumi imiti ajashutino jiiinijeti niquejevi iifutucuui. Jaaneri Moocaani diigo imitico esafutucuui. ⁶ Jaanegui diigoco mahaci oono saatothoco diigo aacihicabadiro buuna. Bu diigoco majaadu oono diigo omooniuono allinoocivi. Bu oono diigo sitaaco iimitino eheetavehicano janaanícivi meheetavo diiguedi. ⁷ Sihidíro aivono, idaasuno icano diigoco momooni oono diigo sihidi mitya mitya icahicagoro, sihidi imitico iimogogoro omoonihicano ticovovi icano. Miíro diigo ijeebiiñodi neehicahi: Jino uujohe aivojigobadi icahi, bu uujohe fibaijigo iicatimaño idaasuno icajitihi, noogoro. ⁸ Jaamaño safucudiro diigoco idaasuno omoonijino ihallívi gaseji: guíjeve, bu idaasu, bu ajeba, bu ciijigairi jigasucafetejigo icano. Miíro jishitiibo Moocaani diigohallívi jilli neehi.

⁹ Jaaneri jiiinijeminaa aivojito diigoma iicahicamo, bu imitico sihidi iimeguehicamo icano ataacasimoro sihidi diigueri idaasuveji diigo ijigano aimuufaico aatyimemere. ¹⁰ Jaamoro diigoco idaasuno omoonino ñihicuti tehesino iicahigoti neejimo: ¡Ayí! Idaasucani diicahi, ijoho Babilonia cuumi iguiraacuumi, sihidi edeevacuumi. Dihallívi sano goovanogayí ico idaasuno omoonino gasehi, noomoro.

¹¹ Bu tollíro jiiinije naajeminaa tuucuumico iidaasuvomoro taacasiji diito inaajecteque isivanoco miihaiñooba anaajecuujitineri. ¹² Jaano diito naajetene: oroneheje, plataneheje, bu oovosiino guisiyineheje, perlaneheje, bu iiminoono gaachehuboogano, sedaboogano, aatyivaneheje, bu tifaihibi iicaneheje icano, bu tollíro fanoova imohono afacinoono, bu marfilneheje, bu iimino imohono, bu bronceneheje, jigaiñoneheje, bu ucuhufono guisibano marmol ononeheje, ¹³ bu canelaneheje naajete, bu afacinoono, maaniguuijino, mirraneheje, facicifaihuno, vinofaihuno, diiribano, bu harinaguuijino, bu ñaavaneheje, bu tollíro asiminaajeteneheje, ovejami, caballomi, bu carrono, bu miyaminaa jijovotehejeque icano.

¹⁴ Jaamoro tuucuumico neejimo: Ijoho sihidi idimeguehicano chahacuui, bu fahijivaró chahacuujino sihidi dibusumije, dihovosineheje icano, noomoro.

¹⁵ Paryí jinehejeque tuucuumico anaajemere sihidi inihibamivahicamo tehesinotíro iicajimo tuucuumico idaasuno omoonino ñihicuti, ihidaasuri ataamoro neejí: ¹⁶ ¡Ayí! Idaasucani sihidi ejeevacuumi icahi. Miíro gaigo imichehujefaño, itifaihibi iicachehujefaño, aatyivachehujefaño icano jiiicínigo, bu orori, imino guisiyineri, perlari icano imibachucinigobadi jeevauhi. ¹⁷ Jaano ajashutino busumije milli goovanogayí finíhi, noomoro.

Jaabadíro bu paryí ciijigaimeenene aivojito bu togajeri igomo, bu togaje dudicamaajeminaa, bu paryí muuainofaño ududicamaaimeheje icano tehesinoro julleecamaaiji. ¹⁸ Jaamoro tuucuumi ijigano aimuufaico aatyimene idaasuri coovadiivejimo: ¿Cuucuumi aivo jiiicuumi ivibadi iicacuumi chahahi? noomoro ¹⁹ inigainohallívi jiiinino gavaracuui iidaasuvomoro, taacasimoro gaibacasiji: ¡Ayí! Idaasucani sihidi ejeevacuumi icahi. Miíro tuucuumi busumijeri paryí muuifaño icijigaimeenenema icamo sihidi nihibamivahicahi. Jaacuumi milli goovanogayí finíhi, noomoro.

²⁰ Jaarunofaño amiihai niquejefaño iicamo tuucuumico mihimoba, bu amiihai Moocaani minisuminaa bu mihimoba, bu paryí Moocaani ijijo

mijibeguehicamo, bu diibota mihicamo icano. Miïro tuucuumico tolli omoonineri amiïhaiño jaadaco Moocaani icihi, nooboro.

²¹ Jaanaaca Moocaani toomominaafi sihidi jeevaabo guisibatygabaco gañiïyiciuhi machuta cahasutaguiisibatygabadi iicabaco. Jaaboro muuaifaño gañiïuhi, jilli nooboro: Jilli gañiïcafetejicuumi baavi sihidi ejeevacuumi Babilonia cuumi. Jaacuumi siino ufucuro atyimeracujitihi. ²² Bu ufucuro dijiïhaiñoñaño arpa, bu siru, miriicuno icano guubuvusucuujiitihi, bu fanoodudicamaajeminaa, bu machutaaco acahasuno guubuvusucuujiitihi icano, ²³ bu ico achicinihicano ciijigaimecuno ifuvusucuujiitihi, bu ufucuro iivi guubuvusucuujitino taabava jiibaimo masino icano, dinaajeminaa sihidi ejeevamo paryi jiinije miyaminaaco dihapichuner i abañihicaumaño.

²⁴ Miïro tuucuumifaño Moocaani iijico ijiibeguehicaumo tiijohoco agañiïuno atyimecafetehe, bu tolliro Moocaanita iicamo tiijoho, bu paryi jiinijehallivi agaicaauhicamo tiijoho icano, nooboro.

19 Jaanobuunati niquejefañoti sefano sihidi miyaminaa unuunoco guubuui:

iAleluya! Itaajasu, iimi, imitya icano paryi Moocaanino.

² Miïro diibo imino miyaanoro emeciïboro dugaacufihi.

Miïro sihidi ejeevano ajevaminaago jiinijeminaaco ihajevari imihininigoco, toono jaadaco acicuubo. Ijeecivominaa tiijohoco agañiïuno jaadaco icicuubo, noomoro.

³ Jaadi siino sefano nuumo: iAleluya! Diigoco ijigasuno aimuufai suufenitino aimuui, noomoro.

⁴ Jaadi bu veinticuatrodimos quillahuto iicamo, bu igueenemehejedimo iicamo icano jiinijehallivi ajavucamaaiumoro Moocaani ihaivoji icagahalliri iicaaboco imuumoro neehicaui: iFine! iAleluya! noomoro.

⁵ Jaanaaca Moocaani aivoji icagajaagoti unuunoco guubuui: Moocaanico mihimo paryi amiïhai diibo jeecevominaa, diiboco mihiguimo mequehefimo, bu munumefiimo icano, noomoro.

Corderobadi Iicaabo Jiibaimo Iicajino.

⁶ Tolliro guubuui sihidi miyaminaa ihiimaabadi iicano, sefano guubuvusuui guisino uguubuvusunicibadi iicano, bu sefano sisiimi igiiriribanicibadi icano, jilli neehicaui:

iAleluya! Aivojiïbo Moocaani sihidi mityama iicaabo

atajiibacumaño. ⁷ Masii imono mihicamoro imo

imo miicaui. Jaamoro diiboco macahacisuui.

Miïro jino Corderobadi iicaabo taabava jiibaimo iicajino gasecuui, bu mogai iicajigo imibaivucuui.

⁸ Jaagoco iimino gaachehu, mihinivatichehu,

aricuchehufaño jiïhacucuumo, noonoro.

Jaano toono iimichehufaño jiïhacuno onono Moocaanita iicamo mihinivatimo iicanoco eneejiruno.

⁹ Jaadi uco Moocaani toomominaafi nuui: Jinooco bu caatini: Imicani icajimo Corderobadi iicaabo taabava jiibaimojaagovi ucuuhuvamo, nooboro.

Jaadi bu uco siino nuubo: Jino Moocaani iiji aivo miyaano iicano, nooboro.

¹⁰ Jaanegui uujoho diiboguino memuiivuui diiboco imequi. Jaarunaa uco nuubo: Tolli moonidino uujoho, bu tolliro Moocaani jeecevominaafi

ijjoho idiicabadiro, bu dinahabomi Jesu jiibogoco suufenitimo
 ijjibeguehicaomabadiro icano. Jaanegui Moocaanico diimo, nooboro.
 Miiro toono Jesu jiibogoco ijjibogomo Moocaani iimaa jiibogominaa.

Eseene Caballohalliri Iicaabo.

¹¹ Jaadi atyimeuhi niqueje faayiciniunoco. Jaanofañoti inuubo
 sesebe caballo. Jaabohalliri iicaubo momou Abañitatiibo, Miyaabo
 icano. Jaabo imino atajjibahicaaboro miyaano iimitinoco iguininiqui
 minaaco eheetavefiibo. ¹² Jaabo aalliino ciijigaiguihunobadi
 jeevauhi, bu inigaihallivi sihidi chaahimigano icauhi, bu imomo
 caatiniciniuhi. Jaamomoco idiiboro diibo gaajauhi. ¹³ Bu jaabo tiijohori
 jeesucinichehufañi jiiciniuhi. Jaabo momou Moocaani iimaa. ¹⁴ Jaabo
 dojicuti fuumo niqueje amocasiminaa imichehuje, mihinivatichehuje,
 sesechehujefañi jicucucinimo. Jaamo bu tolliro seseefiimo
 caballomihalliri icaumo. ¹⁵ Jaabo iijifañoti siijevaga niisuga inoociniuhi.
 Togari jiinijeminaaco iguininiqui. Jaaboro tajiibajiibo jigaiñohiri
 iicanicibadi. Jaaboro aamijiibo oono baacufaihuco ihiciqui itihairi
 iquicunicibadi. Jaaboro diitoco Moocaani imityaabo idaasuno mooniji.
¹⁶ Jaabo idihallivi igaachehuti caatiniciniuno aivojito Aivojiibo, bu
 tajiibaminaa Aivojiibo icano onoomomo.

¹⁷ Jaadi bu atyimeuhi saafi Moocaani toomominaafi nihibahalliri
 julleeciniiboco. Jaabo sefano coovadiivuhi paryi joomi asimi
 niquejeguiinodi agahafomoco: Masaa. Jaamoro mihigaivova ajashutino
 Moocaani machutajaagovi. ¹⁸ Jaamo aivojito uucunoco, amocasiminaa
 aivojito uucunoco, bu esefafiimo uucunoco, bu caballomi uucunoco,
 bu diitohalliri iicahicamo uucunoco miyaamo uucunoco, bu jijovoto
 uucunoco bu unumefiimo uucunoco, bu equehefiimo uucunoco icano
 muduuva, nooboro.

¹⁹ Jaadi atyimeuhi iñihicuuboco, bu tolliro jiinijeminaa aivojito
 ihamocasiminaa igaivuumoro oono eseseene caballohalliri iicaaboma,
 bu diibo amocasiminaa icano imoonicasiqui asaumoco. ²⁰ Jaadi
 iñihicuuboco, bu jihovo iimaaminaafico icano sano agaayiciuboro sisiibo.
 Jaabo diibo jihovo iimaaminaafi iñihicuubo imegavi jabafiranehejeque
 omoonihicaubo. Tonehejefenedi diibo jihovo iimaaminaafi miyaminaaco
 bañihicaui oono iñihicuubo oovotaco agaayiciumoco, bu jaamoro diibo
 ijico iiumumoco icano. Jaamisico gañiubo buheemisico ciijigai jicooba
 azufrema ijigabafañi. ²¹ Jaanoti diitisi yoto guijenica futuui oono
 eseseene caballohalliri iicaubo iijifañoti niisuga iinociniugari. Jaamo
 uucuneri paryi añimi sihidiro tuvauhi.

Mil Año Ticovovi Imino Iicajino.

20 Jaanobuunati atyimeuhi Moocaani toomominaafi ihusefañi
 iñihicuhoji llave, bu jigaiñehityigaba icanoma niquejefañoti
 niituuboco. ² Jaaboro dragonco agaayiciuboro tohiri sisiuhi. Jaaboco
 siicijeo jiinimo, iji, Satanas iicaaboco mil año ticovovi ficuubo. ³ Jaaboro
 diiboco iñihicuhojifañi agañiuboro ihallivi maaniniuhi. Jaaboro tuhuga
 imega igaajataco ficuui siino miyaminaaco bañicuutiibo iicahui mil año

f 19.14-15: Griego iijiri noono: Jaaboro diitoco iisujiibo Moocaani imityaabo sifiira
 aivofaihuco.

ticovovi. Jaadi mil año afatyonobuunati siino sinaayucafetejiibo. Jaaruubo guenene icajitiibo.

⁴ Jaanobuunati atyimeuhi sihidi aivoji icagano iicanoco. Jaanohalliri giciniumo itajiibaqui mityaco agaayiciumo. Tolliro bu atyimeuhi johono Moocaani iijico Jesucristofañodi ijiibeguehicaunohalliti inigainoco iquitiumo jeebiinoco. Jaamo diito inihicuuboco, bu ihijico icano imuutihi. Tolliro bu diibo oovotaco ficusuutimo ihimecuti, bu ihuseti icano. Jaamo ubuheeteumoro Cristoma mil año ticovovi tajiibauhi.

⁵ Jaano toono iticonio buheete iicajino. Jaanoti saatocho uchuumucuumo buheeteutihi. Jari toono mil año afatyonobuunati buheetejimo. ⁶ Imicani icamo Moocanidiro iicamo Jesu buheetebuunati iticonio buheetefañodi iicajimo. Jaamohallivi allivio guijeve imityama chahaji, diitoco cijjigaifaño agañiijirunoma. Jilliro ivi Moocaani Cristo iicamisi sacerdotemitiro icajimo. Jaamoro diiboma mil año ticovovi tajiibajimo.

⁷ Jaano toono mil año afatyonobuunati Satanas siino sinaayucafeteji inihicuhojifañoti. ⁸ Jaadi feejiibo paryi jiinijeminaaco ibañiqui. Jaaboro Magog cuumi, bu Gog cuumi icano iyotoma bañitejiibo. Jaaboro tuucuumici amocasiminaa ajashutimo muuaiño jiinigaiyihaiñobadi iicamoco igaiyicijiibo minaaguiha. ⁹ Jaadi saajimo jiinijejinibacidi. Jaamoro Moocanita iicacuumico, Moocaani agaijicuumico, Jerusale cuumico cabaacujimo. Jaarumohallivi Moocaani cijjigaico agalluuno paryi diitoco jigasuji. ¹⁰ Jaanoti iji diitoco abañiuboco gañiijiibo cijjigai azufrema ijigano jicoobafaño; oono inihicuubo, bu jihovo iimaaminaafi icamisico agañiubafaño. Jahigo idaasuno aivono moonicafetejimo fahijivaro cuujehachuta, fucuhachuta icano.

Sihidi Ejeevano Eseseene Aivoji Icaga.

¹¹ Jaadi atyimeuhi sihidi jeevano seseene aivoji icagaco, bu togahalliri igiciniuboco icano. Jaabo imefeeneti niqueje, jiinije icano sano finiuhi atyimeratino. Jaamaño diito iicaujirumaño atyimerautihi. ¹² Jaadi atyimeuhi paryi iguijevehicaumo unumefiimo, bu equehefimo icano sahigo Moocaani imefeenevi jullelleecinimoco. Jaadi faayiciumo aameneque, tolliro bu sihaame fiivohaameque icano. Jaadi uchuumucuumo jaaducafutuui omoonihicaunoco toohaamejefaño iicaubadi. ¹³ Jaasumi iguijeveumo teehinofaño, bu muuaiñofaño icano buheeteuhi. Jaabadiro bu famooro iguijeveumo jeebiino buheeteuhi guijeveminaa iicahicaumañoti. Jaamoco paryi jaaducafutuui omoonihicaunehique emeciiboro. ¹⁴ Jaadi guijeve, bu guijeveminaa iicahicaumaño icano gañiicafutuui cijjigai jicoobafaño. Jaaba toba cijjigai jicooba allivio guijeve icano. ¹⁵ Jahigo bu tolliro gañiicafutuumo fiivo aamefaño imomono acaatinirautimo icano.

Bohono Niqueje, Bu Bohono Jiinije Icano.

21 Jaanobuunati atyimeuhi bohono niquejeque, bu bohono jiinijeque icano. Miiro iticonio niqueje, bu iticonio jiinije icano ifinicuumañi, bu tolliro muuaiño chahacuuhi icano. ² Uujoho Jua, atyimeuhi imino cuumi, bohono Jerusale cuumi niquejefañoti Moocaani imefeeneti iniituucuumico. Jaacuumi imino imibachuciniuhi gaigo itajevaqui iimibaiquimaainicbadi. ³ Jaanaaca niquejefañoti sefano unuunoco guubuuhi: Meeci, jino Moocaani miyaminaafeeneri jisumi

iicacuunoco. Jaabo diitoma icajiibo. Jaanoti diiteji diibo cuumiminaa icano. Jaabo Moocaani diitoma icaji diito Caaniti iicaqui icano. ⁴Jaamo taafirafaihunoco Moocaani filluji. Jaadi siino guijeve chahacuuji, bu taafiira chahacuuji, bu idaasuhiica, bu aivehicano chahacuuji, eedeene achahacuuji, noonoro.

⁵Jaanaaca ihaivoji icagahalliri igiciniubo nuuhi: Meeci, paryi uujoho bonehejeque eetavehi, nooboro.

Jaadi bu nuubo: Caatini, jino aivo miyahiji aivo miyaano iicano, nooboro. ⁶Jaadi bu uco siino nuubo: Fine, imivocafutucuno. Uujoho imegaoobo, bu allivioobo icano, oono A, Z icano iicabadi iicaabo. Jaabo uujoho adufirari iicaaboco pisirigai nifaihu fiivoco aacifaihuti isuuji jaadusuratino. ⁷Bu mityano iicamo paryi toonoco gaayiciji oono caani busumijeque illi agaayicinicibadi. Jaamo Caaniji uujoho. Jaanoti diiteji taseeme icano. ⁸Jaanoti iñihicuguehcamoco, bu imiyaaveguehcatimoco, bu fanoova imitiminaaco, bu agaicaaufihcamoco, bu gaigoomima imitinoono iicahicamoco, bu apichunoco ihiimaahicamoco, bu jihovo caani ijimico ejeecivehcamoco, bu paryi abañifihihcamoco icano gañijimo ciijigaima azufre ijigano jicoobafano. Jino allivio guijeve iicajino, nooboro.

Bohono Jerusale Cuumi.

⁹Jaanaaca Moocaani toomominaafi sahuse juugahuseti miimisiici idiimo niinoono Moocaani sifiira guirihillunoma iicaumoti saafi tajaa asaaboro uco nuuhi: Juu disaa ico Corderobadi iicaabo taaba iicagoco iifusuqui, nooboro.

¹⁰Jaano toono uco Moocaani Gaija iifusuunofano atyimeuhi Moocaani toomominaafi uco caamovobai guiraabai nijequevi asatyuboro ifusuhi iimino cuumi sihidi ejeevacuumi, Jerusale cuumi niquejefañoti Moocaani imefeeneti iniitucuumico. ¹¹Jaacuumi seseene achiciniuhi Moocaani aricuri. Jaano iharicu ifuvusuhi imino guisiba aricubadi, jaspe guisiba aricu imino oonogoonovi iifuvusunicibadi. ¹²Jaacuumihallidi kuhufono guisiri meegueciniuno ajashutino caamovono. Jaanoti icauno fahuseeci motihaiti mihugaaci idiino. Jaahugaje ticovovi Moocaani toomominaa saafiisa icauhi, bu jaahugajehallivi Israel cuumino fahuseeci motihaiti miicumici idiino iicacuumije momono caatiniciniuhi icano.

¹³Jaano aamijinaagoocuumiti icauno mihugaaci, sahuga idiino, bu nijequenaagoocuumiti icauno mihugaaci, sahuga idiino, bu sanaago gaicujaati mihugaaci, sahuga idiino, bu sinaago gaicujaati mihugaaci, sahuga idiino icano. ¹⁴Jaano tuucuumihallidi fahuseeci motihaiti miibaaci idiino guisibaneri eetavociniuhi. Jaanohallidi imeegueta icauhi. Jaabaajehallivi Corderobadi iicaabo minisuminaa momono caatiniciniuhi.

¹⁵Jaabo Moocaani toomominaafi uuma ihiimaahicaubo oro imeima icaubo tuucuumico iheevequi iguhuganoco, bu imeeguetaco icano. ¹⁶Jaacuumi tehesi sanoodinoruu, bu icarecu, bu icaamovo icano sahachutaruu. Jaacuumico Moocaani toomominaafi ihimeiri uhuuvuuno aciuhi, dos mil doscientos kilometrohachuta. Jaano itehesi, bu caamovi icaamovo, bu icarecu icano samañoviruu icano. ¹⁷Jaadi bu imeeguetaco uhuuvuuno icaamovo aciuhi sesenta y cuatro metrodino miyaminaa oovoniciyomoneri Moocaani toomominaafi uhuuvuuno. ¹⁸Jaanaa imeegueta jaspe guisibaneri eetavociniuhi. Jaanoti ifaacuumiu boti orori nicuciniuhi. Jaano vidriobadi mihinivatino ifuvusuhi. ¹⁹Jaanoti bu imeegueta tano guisibano fanoova

iminoono guisibanerí imibachuciniuhi: Iticoniooba jaspe guisibari imibachuciniuhi; jaano allivioba zafiro onono guisibari imibachuciniuhi; jaano allivioba agata onono guisibari imibachuciniuhi; jaano allivioba esmeralda guisibari imibachuciniuhi; ²⁰ Jaano allivioba onice guisibari imibachuciniuhi; jaano allivioba cornalina guisibari imibachuciniuhi; jaano allivioba crisolito guisibari imibachuciniuhi; jaano allivioba berilo guisibari imibachuciniuhi; jaano allivioba topacio guisibari imibachuciniuhi; jaano allivioba crisoprasa guisibari imibachuciniuhi; jaano allivioba jacinto guisibari imibachuciniuhi; bu niinooba amatista guisibari imibachuciniuhi icano. ²¹ Jaanoti iguhugano docedino iicano perlanorou. Jaahugaje iticovoocivi sano perlaríro eetavociniuhi. Jaanoti tuucuumifeene jiihai sano ororíro eetavociniuhi, imino vidriobadi foovono onooگونوovi ifuvusuuhi.

²² Jaacuumifaño templojaco atyimeutihi Aivojiiβο Moocaani sihidi imityaabo, bu Corderobadi iicaabo icamisico famaňovavíro tuucuumifaño mejeeceiveji. ²³ Jahigo cujeo nihiba, fucuo nihiba icano chahaji Moocaani inamecuri tuucuumico ahachicinimaño, bu Corderobadi iicaabo tuucuumico aachiciniibo iicamaño icano. ²⁴ Jaacuumi seseefaňodi jiiinjeminaa ataaasucafutuumo igueji. Bu jiiinjeminaa aivojito tuucuumijaago imitya, iboci icanoco satyeji. ²⁵ Jaacuumi guhugano fobocirahicajitihi tahigo fucu achahacujimaño. ²⁶ Jahigo jiiinjeminaa imityaco, ibocico icano satyeji. ²⁷ Jaanoti imihinivanoba tahigo feejitihi, bu iidicunoonoco, bu baňiifiraco icano omoonihicamo tahi feejitihi icano. Jaanoti naha idiimoro Corderobadi iicaabohaame fiivohaamefaño imomono acaatinicinimo feeji.

22 Jaadi bu uco iifusuubo muuai imino inifaihu fiivoco aacimuuaiico. Jaamuuai nifaihu jacuhi cristalbadi icahi. Moocaani, Corderobadi iicaabo iicamisi aivoji icagati iinoociniuhi cuumifeenedi. ² Jaacuumi iicaui jiihai imiyaji guiraaaji. Jaaji guiraaro tumuuaijinicidíro icaji. Jaanojinívi fiivo imohooci icahi fanaagovaacijijini. Jaahooci faficabavavíro ifanihibava ticovovi noova icahi fanihibavavíro. Jaahooci aamene jiiinjeminaaco itaabuqui iicano. ³ Bu jahigo afaijacinino chahaji. Tuucuumifaño Moocaani, Corderobadi iicaabo iicamisi aivoji icaga icaji. Jaamisico ijeecivominaa imehicaji. ⁴ Jaamo bu diiboco faño ihimeque atyimehicaji, bu diibo momo ihimecunoti icanoma icajimo icano. ⁵ Jahigo fucu chahaji. Jaamaño tuucuumifaño iicamo siino seseque esucujitihi cijigaimecuno seseque, bu nihiba seseque icano esucujitihi Aivojiiβο Moocaani diitoco ahachicinijimaño. Jahigo diito fahiijivaro aivojitoti icaji.

Jesucristo Asaajino Fiiticuuihi.

⁶ Jaadi bu uco siino Moocaani toomominaafi nuuhi: Jino aivo miyahíji. Jaanoco aivo mimiyaavogo. Diiboro Aivojiiβο Moocaani ihiimaaminaaco, Igaijaco aacifiibo itoomominaafico jino galluuhi ijeecivominaafico ihifusuqui goovano iicajinehejeque.

⁷ Uujoho goovajino asaano, noobo Jesu. Imicani icajiiβο jiihaamefaño Moocaani jiiibogo acaatinicinino onoobadi omooniibo, nooboro.

⁸ Jaabo uujoho Jua jinehejeque guubuuhi, atyimeuhi icano. Jaadi diibo Moocaani toomominaafi tonehejeque uco iifusuuboguino memuiivuui diiboco imeequi. ⁹ Jaarunofaño uco nuubo: Tollí moonidino. Miíro uujoho Moocaani jeecivominaafi iibadiro, bu oono dinahabomi Moocaani iijico iijibeguehicamobadi, bu paryi oono jihaamefaño acaatinicininoco imiyaaveguehicamobadi icano. Jaanegui Moocaanico dihimo, nooboro.

¹⁰ Tolliro bu uco nuubo: Jino Moocaani jiiibogo jihaamefaño acaatinicininoco toovono ficuudino. Miio fiiticuujino toneheje iicano.

¹¹ Jaanegui jaafa iimitiibo iimitico mooniiboro icahi. Jaanoti bu iidicuubo jaafa ihidicuunoco mooniiboro icahi. Jaanoti bu iimiibo jaafa iiminoco mooniiboro icahi. Jaanoti bu Moocaanidiro iicaabo diiboco jeevesutiibo iicaqui.

¹² Jiihi goovajino asaano, noobo Jesu. Jaabo uujoho sivaji paryi omoonihicaneheje jaadaco diitoco aaciqui. ¹³ Jaabo uujoho imegaoobo, bu allivioobo icano, bu iticonioobo, bu nijequeoobo oono A, Z icano iicabadi iicaabo, nooboro.

¹⁴ Imicani icamo imifiitumoco iimitusucuumo fiivoco aacino imohoti imachuqui, bu iguhugari tuucuumifaño ijicafetequi icano. ¹⁵ Jaanoti iidicufimo, bu apichuco ihiimaahicamo, bu gaigooma imitinoono iicafifimo, bu sitaaco agaicaaufifimo, bu jihovo ijimico ejeevifimo, bu paryi famooro bañifiraco iimogomoro omoonifimo icano buhigoro icaji.

¹⁶ Jaabo uujoho Jesu tatyoominaafico galluuhi paryi jinehejeque Moocaani iijanominaaco ijiibeguequi. Jaabo uujoho David tyadimihai tanoobo, bu iyaachimihaiobo icano. Bu tolliro uujoho aaricuubo cuujetavio meecirigaibadi jeevahi, nooboro.

¹⁷ Jilli Moocaani Gaija, bu Corderobadi iicaabo taaba icano neehi: Disaa. Bu jaanoco muguubumo monoo: Disaa.

Bu adufirari mihicamo, mahadunoco mihimogomo masaamoro mahaduva. Jino ifinijitino fiivoco ticovono mahaciji jaadusuratino.

¹⁸ Jaabadiro bu jihaamefaño acaatinicininino Moocaani iijico paryi uguubuhicamoco jino uujoho neehi: Cajaatyohacho jihaamefaño ononehejeque janaanici ucuubaryuhachiji, bu diitohallivi Moocaani galluuji isifiira idasuno omoonijnoco jihaamefaño eneehicacuunoco.

¹⁹ Jaabadiro bu saatoho jihaamefaño Moocaani iiji acaatinicininoti samañoooco agañihachiji, diiboco fiivo imoho noovatati icitiibocoro imicumifañoti gañiji. Jihaamefaño fiivo imohohallidi, bu imicumihallidi icano fone iimaacuui.

²⁰ Jinehejeque ijiibogoobo jilli neehi: Jiihi goovajino asaano, nooboro. Jiihi. iDisaa, Aivojiibo Jesu!

²¹ Jaafa Mohaivojiibo Jesucristo paryi amiihaico imino moonihi. Fine.